

କରକ୍ତିୟ ବିଶ୍ୱାସୀମାନଙ୍କ ନିକଟକୁ ପାଉଲଙ୍କ ଦ୍ୱିତୀୟ ପତ୍ର କରକ୍ତିୟ ବିଶ୍ୱାସୀତ୍ ଗାର୍ଗେ ପାଉଲ୍‌ଙ୍କ ଦ୍ୱିତୀୟ ଚିଠି

୨ କରକ୍ତିୟ ବଇ ବିଷୟରେ ଅଣ୍ଟୟ ପଦ୍

ଦ୍ୱିତୀୟ କରକ୍ତି ପ୍ରେରିତ୍ ପାଉଲ୍‌ଙ୍କ ଆଦ୍ୟାବେଳେ ଜିସୁ କ୍ରିଷ୍ଟନ୍ ଜନମ୍‌ରେ ସାରେ ୫୫-୫୬ ଏଣ୍ଟ ପେରକେ ଲେକ୍‌ତାଦ୍ ଆସ୍‌ମାତ୍‌ରେ । ୧-୧ ମାନ୍ ପାକ୍ ମାନ୍‌ନ୍ କରକ୍ତିୟ ମଣ୍ଡଲିତିଙ୍କ ଲେକ୍‌ତାଦ୍ ଆସ୍‌ମାତ୍‌ରେ ଚିଠି ଲୋପେଙ୍କ ଇଦ୍ ଆଦୁତ୍‌ରେ ପାଉଲ୍‌ଙ୍କ ଦ୍ୱିତୀୟ ଚିଠି । ପଣ୍ଡିତିତ୍ ବିଶ୍ୱାସ୍ ମାଡିତ୍‌ରେ, ଯେ, ଇଦିନ୍ ମୁନେଙ୍କ ପାଉଲ୍ କରକ୍ତିୟ ମଣ୍ଡଲି ଗାର୍‌ରେ ଅଣ୍ଟୟ ଆଣ୍ଟ ଚିଠି ଲେକିମାତ୍‌ତଣ୍ଟ ୨:୩-୪ ପଦତାଗ୍ ଅଣ୍ଟ ବାଡ୍ ଗର୍ ଇଦ୍‌ତଣ୍ଟ, ଆଦିନ୍ ବାଡ୍‌ବା ନକଲ ମାୟାଗ୍ ଇଲ୍‌ଲେ । ଆଦ୍ୟାବେଳେ ପାଉଲ୍ ମାକିଦୋନିଆତାଗ୍ ମାନ୍‌ନ୍ ଖେଲେ ଦ୍ୱିତୀୟ କରକ୍ତିୟ ଲେକିମାତ୍‌ତଣ୍ଟ ୨:୧୩ ।

ଦ୍ୱିତୀୟ କରକ୍ତି ଆଦୁତ୍‌ରେ ମେଣ୍ଟେନଣ୍ଟ ଅଦ୍ୱିତୀୟ କରକ୍ତି ଇଲ୍‌ଲେ, ଆଦ୍ ଗାଟି ନିଜେତାଦ୍ ନୁ ଆଲ୍‌ସାନ୍ ଲେକେତାଦ୍ । କରକ୍ତିୟତାଗ୍ ମାନ୍‌ନ୍ ମଣ୍ଡଲି ବିଷୟରେ ତୀତସ୍ ତାଗାଙ୍କ୍ ସାୟେଡ୍ କାବୁର୍ ପାଏମ୍‌ଆସ୍ ପାଉଲ୍ ଖେଡ୍‌କ୍‌ତଣ୍ଟ । ଇଦ୍ ଚିଠିତାଗ୍ ପୁନାଦ୍ ନିୟମତାଦ୍ ଦାନ ବିଷୟରେ ଶିକ୍ଷା ପାଏମ୍ ଆଦ୍‌ତାଡ୍ । ଇଦ୍ ଲେକ୍‌ତାଗ୍, ବେଗେ ପାଉଲ୍ ଜିରୁଗାଲେମ୍‌ରେ ବିଶ୍ୱାସୀତ୍‌କିଙ୍କ୍ ସାହାଯ୍ୟ ମାଡାନ୍ ସେଙ୍ଗେ ଡାବ୍‌କ୍ ତାଲ୍‌କାନଙ୍କ୍ ନିର୍ଦ୍ଦେଶ୍ ଇଦ୍‌ତଣ୍ଟ ୮-୯ । ଇଦ୍ ପୁନ୍‌ନାଙ୍କ୍ ଆଦୁତ୍‌ରେ ଯେ, ମଣ୍ଡଲି ବାୟିଦେ କନ୍‌ସ୍ ବେସ୍‌କ୍‌ତୁଡ୍ ମିର୍ ପ୍ରେରିତିତ୍, ଅଡ୍ ନିଜେତିଙ୍କ୍ ପଦ ଉନ୍ନତି ମାଡାନଙ୍କ୍ ପାଉଲ୍‌ଙ୍କେ ବିରୁଦ୍‌ରେ ମଣ୍ଡଲିତେ ବେସ୍‌କ୍‌ତୁଡ୍, ନିର୍ଦ୍ଦେଶ୍ ନାରୁଡ୍‌କିଙ୍କ୍ ଇଂସା ବ୍ୟବହାର ମାଡ୍‌ତୁଡ୍ । ଅଡ୍ ପାଉଲ୍‌ଙ୍କେ ଅଦିକାର୍‌ଦିଙ୍କ୍ ନାକିଙ୍କ୍ ହେର୍କା ମାଡ୍‌ତୁଡ୍ । ବେଲାନକି ଦ୍ୱିତୀୟ କରକ୍ତି

ମାଡ଼େଇଁତେ ଖେଲେ ଅଣ୍ଟୁ ଖେରଣ୍ଟୁ ଜିସୁ କ୍ରିଷ୍ଟନ୍ ଅଦିକାରତେ ଖେରଣ୍ଟୁ
ପ୍ରେରିତ୍ ଇଞ୍ଜି ଗାଡ଼ସ୍ ତଡ଼୍ ପ୍ରାମାନ୍ ମାଡ଼ତୁଣ୍ଟୁ ।

ବଇଡ଼ ଲୋପେ ମାନ୍ଦାନ୍ ମୁକ୍ୟ ବିଷୟ

୧. ପାଉଲ୍ ଚିଟିତ୍ ଆରାମ୍ତେ ଖେଲେ ନମସ୍କାର ମାଡ଼ତୁଣ୍ଟୁ । ୧:୧-୭

୨. ପାଉଲ୍ ତାନ୍ ଆଦାଙ୍କ୍ ତିୟାର୍ ଆଡ଼ତାଗ୍ ବାଦ୍ଲେମ୍ ନୁ ଅଡ଼୍
ବିଷୟତେ ଦରକିମାନ୍ଦାନ୍ ତଥ୍ୟ ନୁ ତାନ୍ ଚିଟି ବିଷୟତେ ଅଡ଼ାଦ୍
ଜବାବ୍ । ୧:୮-୭:୧୭

୩. ପାଉଲ୍ ଜିରୁଣାଲେମ୍ତେ ବିଶ୍ୱାସୀଡ଼୍ ମାୟଦିଙ୍କ୍ ଦାନ ଆଦାୟ୍
ମାଡ଼ାନ୍ ବିଷୟତେ ନିର୍ଦ୍ଦେଶ୍ ଇଦତଣ୍ଟୁ । ୮:୧-୯:୧୫

୪. ମାଡ଼େଇଁ ପାଉଲ୍ ତାନ୍ ପ୍ରେରିତ୍ ପଦ ସୁରକ୍ଷା ମାଡ଼ିତନ୍ ନୁ
ମେଣ୍ଟେ ଆଦାନ୍ ସେଙ୍ଗେ ସତର୍କ ମାଡ଼ିତନ୍ । ୧୦:୧-୧୩:୧୦

୧୨ ନାନ୍ ପାଉଲ୍, ଇଶ୍ୱରତେ ଇଚ୍ଛା ଲେକାମ୍ ଜିସୁ କ୍ରିଷ୍ଟନ୍ ପ୍ରେରିତ୍
ନୁ ମାନ୍ ଦାଦାଲ୍ ତୀମତି, କରନ୍ତି ମଣ୍ଡୁଲିତାଗ୍ ଲେକ୍ତୁତାନ୍ ନୁ ଆଖାୟା
ଦେଶ୍ତେ ସାରେ ବିଶ୍ୱାସୀ ପାକେ ଇଦ୍ ଚିଟି ଲେକମିଡ୍ରେନ୍ ।

୨ ମାନ୍ ବାବାଲ୍ ଇଶ୍ୱର ନୁ ପ୍ରବୁ ଜିସୁ କ୍ରିଷ୍ଟ ମିକିଂଙ୍କ୍ ଅନୁଗ୍ରହ ନୁ ଶାନ୍ତି
ଇଞ୍ଜିଣ୍ଟୁ ।

ପାଉଲ୍ ଇଶ୍ୱରତିଙ୍କ୍ ଦନ୍ୟବାଦ୍ ଇଡ଼ତନ୍

୩ ଖାଡ଼ାଟ୍, ମାନ୍ ପ୍ରବୁ ଜିସୁ କ୍ରିଷ୍ଟନ୍ ବାବାଲ୍ ଦନ୍ୟ ନାରୁଣ୍ଟୁ,
ଦୟାକାରି ନୁ ସାରେତଡ଼୍ ସାହାଯ୍ୟତେ ଉତ୍ସ, ଇଶ୍ୱରତିଙ୍କ୍ ଦନ୍ୟବାଦ୍
ଇଦିକାଡ଼୍ ।

୪ ମାନ୍ ଦୁଃକାମ୍ କଷ୍ଟ ଖେଲେ ଇଶ୍ୱର ମାନ୍ ବେନ୍ ସାନ୍ନା ଇଦତନ୍,
ଆଦ୍ ସାନ୍ନା ତଡ଼୍ ମାନାଡ଼୍ ଦୁଃକାମ୍ କଷ୍ଟ ମାଡ଼ମାନ୍ତାନ୍ ବାଗାତଡ଼୍
ସାନ୍ନା ଇଦଦେ ପାଦ୍ତାଡ଼୍ ।

୫ ମାନାଡ଼୍ କ୍ରିଷ୍ଟନ୍ ଗାଟି ଦୁଃକାମ୍ କଷ୍ଟତାଗ୍ କାଉଲ୍ତାଙ୍କ୍ କ୍ରିଷ୍ଟନ୍
ତଡ଼୍ ଇଶ୍ୱରତେ ମହାସାନ୍ତନାତେ ମିକା ତଡ଼୍ ଆଦେ ପାଦ୍ତାଡ଼୍ ।

୬ ମାନାଡ଼୍ ଯଦି ଦୁଃକାମ୍ କଷ୍ଟ ମାଡ଼ିତାଡ଼୍, ଆଦ୍ ମିକିଂଙ୍କ୍ ଉପକାର ନୁ
ପରିତ୍ରାଣ ସେଙ୍ଗେ । ମାନ୍ ସାନ୍ନା ଦକେ, ମିଡ଼୍ ମିକା ଆଦେଲେକାମ୍

ଗାଡ଼ସ୍ତେ ଦୁଃକାମ୍ କଷ୍ଟ ମାଡ଼ାନ୍ ସେଙ୍ଗେ ସାନ୍ନା ନୁ ଶକ୍ତି ଦରକିଡ଼ ।

୭ ମିୟାର୍ ମାଞ୍ଜାଦ ଆଗେ ମିନ୍ତେ । ମାମ୍ମେ ପୁଡ଼ତମ୍, ମିଡ଼୍ ମାୟାଦ ଦୁଃକାମ୍ ତିପାଲ୍‌ତେ ବେଲାନ୍ ତଡ଼୍ ଆସ୍‌ମିନ୍ତେମ୍, ଆଦ୍‌ଲେକାମ୍ ମା ସାନ୍ନାତାଗ୍ ମିକା ତଡ଼୍ ଆଦ୍‌ତିଡ଼୍ ।

୮ ☆ହୋ ଦାଦାଲଡ଼ି ନୁ ଏଲ୍ଲାସ୍, ମାମ୍ମେ ଏସିଆ ପ୍ରଦେଶ୍‌ତେ ମା ପରୁ ଗଟେମ୍ ଆସ୍‌ମାନ୍‌ନ୍ କଷ୍ଟ ବିଷୟ ମିକିଂଙ୍କ କେତାନଙ୍କ ଇଚ୍ଛା ମାଡ଼ତୁମ୍ । ଆଦ୍ କଷ୍ଟ ସହେମ୍ ଆଦେପାର୍ନାଙ୍କ ମାମ୍ମେ ଜୀଞ୍ଜୁନ୍‌ତେ ଆଗେ ଝିଡ଼ସିଡ଼ତମ୍ ।

୯ ମାକିଂଙ୍କ ତଲାନ୍ ଗର୍ ଇସ୍‌ମିନ୍ତେଡ଼୍ ଇଞ୍ଜ ଆଲ୍‌ସମାଡ଼ତମ୍ । ବାତେଙ୍କ ଇଡ଼କେ ଇଦ୍ ଗଟେମ୍ ଆଡ଼ତେ, ଆଦିଙ୍କ ନିଜେଡ଼୍ ପରୁ ଆଗେ ମାଡ଼କର୍ ତଲାନଙ୍କ ଜୀଞ୍ଜୁନ୍ ଇସ୍‌ମାନ୍‌ନ୍ ଇଶ୍‌ବରତେ ପରୁ ଆଗେ ଖାଡ଼ତମ୍ ।

୧୦ ଅଣ୍ଟ ମାକିଂଙ୍କ ବୟାନକ୍ ତଲ୍‌ତାଗାଙ୍କ ଉଦ୍‌ବାର ମାଡ଼ତଣ୍ଟ ନୁ ଉଦ୍‌ବାର ମାଡ଼ିତନ୍, ମେଣ୍ଟେ ଅଣ୍ଟ ଯେ ବବିଷ୍ୟତ୍‌ତେ ମିକା ଉଦ୍‌ବାର ମାଡ଼ିତନ୍, ଅନାଗେ ମାୟାଦ ଇଦ୍ ଆଗେ ମିନ୍ଦେ ।

୧୧ ମିଡ଼୍ ପ୍ରାର୍ତ୍ତନା ତଡ଼୍ ମାକିଂଙ୍କ ସାହାୟ୍ୟ ମାଡ଼ାର୍ । ଆଲାକେ, ମା ସେଙ୍ଗେ ମାଡ଼ମାନ୍‌ନ୍ ନାରଗେ ପ୍ରାର୍ତ୍ତନାତାଦ୍ ଉତ୍ତର ଦରକିଡ଼ ନୁ ଇଶ୍‌ବର ମାକିଂଙ୍କ ଆଗର୍ ବାଦ୍ ମାଡ଼ିତନ୍ । ମା ସେଙ୍ଗେ ନାରଗେ ନାରୁଡ଼୍ ଇଶ୍‌ବରତିଙ୍କ ଦନ୍ୟବାଦ୍ ଇଦ୍‌ଡ଼୍ ।

ପାଉଲ୍‌ତେ ଯୋଜନାତାଗ୍ ବାଦ୍‌ଲେମ୍

୧୨ ଜଗତ୍‌ତେ ଜିଞ୍ଜୁନ୍ ନୁ ବିଶେଷ୍‌ତେ ମିଇ ତଡ଼୍ ମାୟାଦ ସମ୍ପର୍କ ଇଶ୍‌ବରତେ ପବିତ୍ରତା ନୁ ବିଶ୍ୱସ୍ତତା ତଡ଼୍ ପରିଚାଲିଡ଼ ଇଞ୍ଜ ମାନ୍ ମୋନ୍‌ତାଦ୍ ସାକ୍ଷ୍ୟ । ଇଦିନ୍ ସେଙ୍ଗେ ମାନ୍ ମନ୍‌ତାଗ୍ ଗର୍ବ ଆଦ୍‌ତେ । ମାନବିକ୍ ରୁଦ୍‌ତେ ଆୟ୍‌ୟ, ମାତର୍ ଇଶ୍‌ବରତେ ଅନୁଗ୍ରହ୍‌ତଡ଼୍ ଆଦ୍ ମାଡ଼ାନଙ୍କ ମାମ୍ମେ ତିଆର୍ ଆସ୍‌ମିନ୍ଦେମ୍ ।

୧୩ ବାଡ଼ କାର୍‌ସ୍ ମିଡ଼୍ ବୁଜେମ୍ ଆଦ୍‌ତିଡ଼୍, ମୀଇପାକେ ମାମ୍ମେ ମାତର୍ ଆସରେ ଲେକୁତମ୍ ।

୧୪ ନାନ୍ ଆଗେ ମାଡ଼ତୁନ୍, ଇଞ୍ଜେ ବାଡ଼ ଇସୁର୍ ବୁଜେମ୍ ଆଦୁତିଡ଼, ଆଦ୍ ଆସୁଟେ ପ୍ରବୁ ଜିସୁନ୍ ଖାଦାନ୍ ଦିନାମ୍‌ତେ ସାରେ ବୁଜେମ୍ ଆଦ୍‌ତିଡ଼ । ଆଲେକେ, ମିଡ଼୍ ମା ସେଙ୍ଗେ ଗର୍ବ ମାଡ଼ିତିଡ଼୍ ନୁ ମାମ୍‌ମେ ମିକା ମିଇ ସେଙ୍ଗେ ଗର୍ବ ମାଡ଼ିତମ୍ ।

୧୫ ଇଦ୍ ବିଷୟ୍‌ତେ ନାନ୍ ନିଜାମ୍ ଲେକାମ୍ ପୁଞ୍ଜମାଡ଼ତାଙ୍କ୍ ମୁନେନ୍ ମିଇ ଗାରେ ଆଦ୍‌ଦାନ୍ ସେଙ୍ଗେ ନାୟାଦ୍ ଇଚ୍ଛା ମାଡ଼ତେ । ଆଲେକେ, ମିଡ଼୍ ରେଣ୍ଡଦାମ୍ ନାକିଂ ଉଡ଼ି ଖେଡ଼କ୍ ମାଡ଼େ ପାର୍‌ଖେଡ଼ି ।

୧୬ ☆ମାସିଦୋନିଆ ଆଦାନ୍ ଖେଲେ ନୁ ଆଗାଙ୍କ୍ ମାଲ୍‌ଦାନ୍ ଖେଲେ ମିଇ ପାକେ ବସ୍ ଦିନା ମାନ୍‌ଦାନ୍ ନାୟାଦ୍ ଇଚ୍ଛା ମାଡ଼ତେ, ବାତେଙ୍କ୍ ଇଡ଼କେ ଯିହୁଦା ପ୍ରଦେଶ୍‌ତାଗ୍ ଆଦାନ୍ ସେଙ୍ଗେ ନାନ୍ ମିୟାଦ୍ ସାଆୟା ଦର୍କିକାର୍ ମାଡ଼ତେ ।

୧୭ ନାନ୍ ବାଡ଼ ନିଜାମ୍ ଆୟ୍‌ଖେକଟେ ଇଦ୍ ପାଡ଼୍‌ୟି ତାଲିକା ତିଆର୍ ମାଡ଼ିମାଡ଼ତାନ୍ ? ବେନଡ଼୍ ଅଣ୍ଡୟ୍ ତଡ଼େକ୍ “ଆଁ, ନୁ ଇଲ୍‌ଲେ, ଇଲ୍‌ଲେ,” ମାଡ଼ିତଡ଼୍ ଅଡ଼ଲେକାମ୍ ବାତେଏ ନାନ୍ ଜିନେଡ଼୍ ସ୍ଵାର୍ତ୍‌ସିଲି ସେଙ୍ଗେ ନାୟାଦ୍ ପାଡ଼୍‌ୟି ମାଡ଼ିତାନ୍ ?

୧୮ ନିଜାମ୍ ଇଶ୍ଵର ବିଶ୍ଵାସ୍‌ତେ ତଣ୍ଡ୍, ବେନ୍ କବର୍ ନାନ୍ ଇଦ୍‌ତାନ୍ ଆଦ୍ “ଆଁ ବା ନା,” ଆୟ୍‌ୟ ।

୧୯ ☆ସିଲେ, ତାମତି ନୁ ନାନ୍ ମିଇ ଗାରେ ପ୍ରଚାର୍ ମାଡ଼ମାନ୍‌ଦାନ୍ ଇଶ୍ଵରତେ ମାର୍ ଜିସୁ କ୍ରିଷ୍ଟ୍, ବେସୁଙ୍କ୍ ଖେରଡ଼୍ ତଡ଼େକ୍ “ଆଁ ନୁ ଇଲ୍‌ଲେ,” କେଲଣ୍ । ମେଣ୍ଡେଅଣ୍ ରକମ୍, ଅଣ୍ ଆଦୁତନ୍ ଇଶ୍ଵରତେ “ଆଁ ।”

୨୦ ଆଦିଙ୍କ୍ ଇଶ୍ଵରତେ ସାର୍‌ରେ ପ୍ରତିଜ୍ଞା ସାରେ ସଡ଼୍ ଆଡ଼ତେ, ଆସ୍ତ୍ର ସାରେ ଆଁ ଅଡ଼ାଗେ ମିନ୍ଦେ; ଇଦିନ୍ ସେଙ୍ଗେ ଜିସୁ କ୍ରିଷ୍ଟନ୍ ତଡ଼୍, ଇଶ୍ଵରତେ ଗୌରବ୍ ସେଙ୍ଗେ ମାମ୍ ଆମେନ୍ ମାଡ଼ିତମ୍ ।

୨୧ ଇଗେ ନିଜେ ଇଶ୍ଵର ଜିସୁ କ୍ରିଷ୍ଟ୍‌ନାଗ୍ ମିୟାଦ୍ ନୁ ମାନ୍ ଜିହୁଣ୍ଡିଟିଙ୍କ୍ ଅଣ୍ଡୟ୍ ମାଡ଼ି ସୁରକ୍ଷା ମାଡ଼୍‌ତଣ୍ ।

୨୨ ଅଣ୍ ମାନ୍ ଖେରେ ମାଡ଼ି ମିନ୍ଦେନ୍ ନୁ ମାନ୍ ହୃଦୟ୍‌ତାଗ୍ ତାନ୍ ପବିତ୍ର ଆମ୍‌ତିଙ୍କ୍ ନେଃଏତାଙ୍କ୍ ମାନ୍ ପରୁ ମାଲିକ୍ ଆଡ଼ତଣ୍ । ପବିତ୍ର

ଆମ୍ଭ ଆଦୁତ୍ତେ, ମାନ୍ ପରୁ ଇଶ୍ବରତେ ଅଦିକାରତେ ଚିଃଏନେ ନୁ
ବବିଷ୍ୟତ୍ତେ ମାନ୍ ବାଡ଼ ଦରକିଡ଼, ଆଦିନ୍ ଗେରେଣ୍ଟି ଲେକାମ୍ ।

୨୩ ଇଶ୍ବର ଆଦୁତନ୍ ନା ସାକି । ଅଣ୍ଟ ନା ଜିଝୁଣ୍ଟିଜ୍ ପୁଡ଼ତଣ୍ଟି ।
ମିକିଂଙ୍କ ନାନ୍ନେ ମେଣ୍ଟେ ବେଲାନ୍ ତିପାଲ୍ ଇଞ୍ଜନ୍, ଆଦିନ୍ସେଙ୍ଗେ
ନାନ୍ କରନ୍ତି ଆଦାନଙ୍କ ମାନ୍ ମାଡ଼ନ୍ ।

୨୪ ମିଡ଼୍ ବେନ୍ ଗଡ଼ତିଙ୍କ ବିଶ୍ବାସ୍ ମାଡ଼ିତିଡ଼, ଇଦ୍ ବିଷୟତେ ମିଇ
ପରୁ ଶାସନ୍ ମାଡ଼ାନଙ୍କ ମାମ୍ମେ ଆଲ୍‌ସି ମାଡ଼ମ୍, ବାଡେଙ୍କ ଇଡ଼କେ
ମିଡ଼୍ ବିଶ୍ବାସ୍ତାର୍ ଲେକାମ୍ ଗାଡ଼ସ୍ ମିନ୍ଦେଡ଼ି । ଇଡ଼କେ ମିଇକିଂଙ୍କ
ମାଡ଼ର୍ ଝେଡ଼କ୍ ମାଡ଼ାନ୍ ସେଙ୍ଗେ ମିଇ ତଡ଼୍ ଅଣ୍ଟୟାର୍ କାଲ୍ଲି
ମାମ୍ମେ ପାଡ଼ୟି ମାଡ଼ତୁମ୍ ।

୨

୧ ଯଦି ନାୟାଦ୍ ମିଇ ବକେଡ଼ ଆଦାନାଦ୍ ମିଇ ସେଙ୍ଗେ ଦୁଃକାମ୍
ଆଦତେ, ମିଇ ପାକେ ମେଣ୍ଟେ ବେସୁଙ୍କ ଆନନ୍ ଇଞ୍ଜ ନାନ୍ ମାନ୍
ମାଡ଼ତାନ୍ ।

୨ ମିକିଂଙ୍କ ଦୁଃକାମ୍ ଇଡ଼କେ, ନାକିଂଙ୍କ ବେନ ଝେଡ଼କ୍ ଇଦତନ୍ ?
ମିକିଂଙ୍କ ଝିଡ଼ସ୍‌କେ ମେଣ୍ଟେ ବେନ ଆଦ୍‌ଲେକାମ୍ ଇଲାଣ୍ଟି ।

୩ ଆଦିନ୍ ସେଙ୍ଗେ ନାନ୍ ମିକିଂଙ୍କ ଚିଟି ଲେକତାନ୍, ନାନ୍ ଆଗେ
ଆଡ଼କେ; ବେନଡ଼୍ ସେଙ୍ଗେ ନାୟାଦ୍ ଝେଡ଼କ୍ ଆୟେଡ଼୍, ଅଡ଼୍ ତଡ଼୍
ବେଲାନ୍ ନାନ୍ ଦୁଃକାମ୍ ଆୟନ୍ । ନିଜାମ୍ ନାୟାଦ୍ ଗାଡ଼ସ୍ ବିଶ୍ବାସ୍
ୟେ, ନାୟାଦ୍ ଝେଡ଼କେତାର୍ ମିୟାଦ୍ ଝେଡ଼କ୍ ।

୪ ଗାଟି ଦୁଃକାମ୍ ନୁ କଷ୍ଟ ଜିଝୁଣ୍ଟେ କେୟି କେୟି ନାନ୍ ବେନ୍ ଚିଟି
ଲେକିମାଡ଼ତାନ୍, ମିକିଂଙ୍କ ଦୁଃକାମ୍ ଇଦାଙ୍କ ଆୟନ୍, ମାଡ଼ର୍ ମିକିଂଙ୍କ
ନାନ୍ ବେସର୍ ପ୍ରେମ୍ ମାଡ଼ତୁମ୍, ଇଦ୍ କେତାନାଦ୍ ମାଡ଼ତେ ଆଦ୍
ଚିଟିତେ ଲେକାମ୍ ।

ଦୋଷୀଙ୍କ କ୍ଷମା ମାଡ଼ାନ୍

୫ ଯଦି ବେନ ବେନଙ୍କ ଦୁଃକାମ୍ ଇସ୍‌ମାନ୍‌ତନ୍, ଅଣ୍ଟ ମାଡ଼ର୍ ନା
ମୋନତାର୍ ଦୁଃକାମ୍ ଇଞ୍ଜଣ୍ଟି, ଇସ୍‌ର ବା ନାର୍‌ଗେ ମିକିଂଙ୍କ ଆନତେ
ଦୁଃକାମ୍ ଇଡ଼ତନ୍ । ଇଦ୍ ବିଷୟତେ ନାନ୍ ଅଦିକ୍ ତିପାଲ୍ ପାଡ଼ୟି
ଇଦାନ୍ ସେଙ୍ଗେ ଇଛା ମାଡ଼ନ୍ ।

୭ ମିଛ ଲୋପେଙ୍କ ନାରଗେ ମତ ଇସାବ୍‌ରେ ଆଦ ନାରୁଙ୍କ ବେନ ଦଣ୍ଡ ଇଡ଼ତଡ଼, ଆଦ ଅନ୍ ମାୟୁଦିଙ୍କ ନାରଗେ ।

୮ ଆଦିଙ୍କ ଅଣ୍ଡ ବେଲା ପିନା ଦୁଃକାମ୍ ଆୟୁୟଣ୍ଡ, ଆଦିନ୍‌ସେଙ୍ଗେ ମିଡ଼ ଅଂକିଙ୍କ ଇଞ୍ଜେ କ୍ଷମା ମାଡ଼ାର୍ ନୁ ସ୍ବାନ୍ତନା ଇମୁର୍ ।

୯ ମିକିଙ୍କ ନାୟାଦ୍ ଅନୁରୋଦ୍, ମିଡ଼ ଅଂକିଙ୍କ ପ୍ରେମ ନୁ ସାର୍‌ଦେ ମାଡ଼ଡୁଡ଼ ଇଞ୍ଜ କେସିମୁର୍ ।

୧୦ ମିଡ଼ ସାର୍‌ରେଙ୍ଗେଲେ ନାୟାଦ୍ ନିର୍ଦ୍ଦେଶ୍ ନୁ ଶିକ୍ଷା ପାଲନ୍ ମାଡ଼ାନଙ୍କ ପୁୟାନ୍ ସେଙ୍ଗେ ନାନ୍ ଆଦ୍ ଚିଟି ଲେକିମାଡ଼ତାନ୍ ।

୧୧ ବେସୁର୍ ଅଡ଼କିଙ୍କ କ୍ଷମା ମାଡ଼ିତିଡ଼, ନାନ୍ ମିକା ଅଂକିଙ୍କ କ୍ଷମା ମାଡ଼ିତାନ୍ । ନାନ୍ ଯଦି ବାତେବା ବିଷୟରେ ଅଂକିଙ୍କ କ୍ଷମା ମାଡ଼ିମାନ୍ତାନ୍, ଆଦ୍ କ୍ରିଷ୍ଣଙ୍କ କାଲିଲି ମିଛ ସେଙ୍ଗେ ମାଡ଼ିମାନ୍ତେ ।

୧୨ ଆଦିଙ୍କ ଶୟତାନତିଙ୍କ ମାନ୍ ବିରୁଦ୍ଧରେ ବାତେବା ପାଡ଼ିୟି ମାଡ଼ାନଙ୍କ ସୁପର୍ ଦକ୍; ତାନ୍ ସାର୍‌ରେ ଯୋଜନା ମାନାଡ଼ ପୁଡ଼ତାଡ଼ ।

୧୩ କ୍ରିଷ୍ଣନ୍ ସୁସମାଚାର ପ୍ରଚାର ମାଡ଼ାନଙ୍କ ଡ୍ରୋୟା ଦୀପ୍ତଗର୍ ହେଉସ୍ ନାନ୍ ଉଡ଼ତାନ୍, ଇଦ୍ ପାଡ଼ିୟିଦେ ସେଙ୍ଗେ ପ୍ରବୁ ଆର୍ ଟେଣ୍ଡିଡ଼ତନ୍ ।

୧୪ ବାତେଙ୍କଇକ୍ ମାନ୍ ଦାଦାଲ୍ ତୀତସ୍ତିଙ୍କ ଆଗେ ଉଡ଼କର୍ ନାନ୍ ଦାୟେ ଆଡ଼ତାନ୍ । ଆଦିଙ୍କ ଆଗେ ନାରିଡ଼ାଗାଙ୍କ ଆଞ୍ଜ ନାନ୍ ମାସିଦୋନିଆତା ଆଡ଼ତାନ୍ ।

କ୍ରିଷ୍ଣନ୍ ତଡ଼ ଜିଡ଼ାନାଦ୍

୧୫ ଇଶ୍ବରରେ ଦନ୍ୟବାଦ୍ ଆୟି । ବାତେଙ୍କ ଇଡ଼କେ ଅଣ୍ଡ ଜିସୁ କ୍ରିଷ୍ଣନ୍ ତଡ଼ ସାରେଦାମ୍ ମାକିଙ୍କ ଜିଡ଼ାନ୍ ଆର୍‌ଦାଗ୍ ମୁନ୍‌ନେ ଆଦ୍‌ତନ୍ । ମେଣ୍ଡେ ଲେକେଡ଼ ଗାବ୍ ଚାରେପାକ୍ ଲିକ୍‌ରେ ଲେକାମ୍ କ୍ରିଷ୍ଣନ୍ ବୁଦ୍‌ରେ ବାଗାତଡ଼ ଇଦାନଙ୍କ ଇଶ୍ବର ମାକିଙ୍କ ବ୍ୟବହାର ମାଡ଼ିତନ୍ ।

୧୬ ମାନାଡ଼ ଆଦୁତାଡ଼ ଇଶ୍ବରରେ ଗର୍‌ରେ ନିବେଦିତ କ୍ରିଷ୍ଣନ୍ ସାୟେ ଗାବ୍‌ରେ ଦୁପାମ୍ ଲେକାମ୍ । ବାଡ଼ ବେନଡ଼ ପରିତ୍ରାନ୍ ପାଏମ୍ ଆଦ୍‌ତଡ଼, ନୁ ବେନଡ଼ ନଷ୍ଟ ଆର୍‌ଦେ ନାରୁଡ଼, ଅଡ଼ ବକେଡ଼ ନିସ୍ତାର ଲାଡ଼ତଡ଼ ।

୧୭ ବେନଡ଼, ଡଲାନ ଆରଦାଗ୍ ଆଦତନ୍; ଅଡ଼୍ ସେଙ୍ଗେ ଇଦ୍ ଡଲନାଦ୍ ଲେକାମ୍, ବେନଡ଼ ପରିତ୍ରାନ୍ ପାଏମ୍ ଆଡ଼ତଣ୍, ଅଡ଼୍ ସେଙ୍ଗେ ଇଦ୍ ସାରେଦିନାଡ଼ ଜିଞ୍ଜେମାନ୍ନାନ୍ନାଦ୍ । ବାତେଙ୍ଗ୍‌ଇକ୍ରେ ଇଡ଼କେ ଇଦ୍ ପାଡ଼୍‌ୟି ମାଡ଼ାନ୍ ସେଙ୍ଗେ ବେନ ପାର୍‌ଦତଣ୍ ?

୧୭ ନାରଗେ ନିଜେ ଲାବ୍‌ଆଦାନ୍ ଆଦାନ୍ ସେଙ୍ଗେ ଇଶ୍‌ବରତେ ବାକ୍ୟ ବ୍ୟବହାର ମାଡ଼ିତଡ଼୍ । ଇଡ଼କେ ମାନାଡ଼୍ ଆଦ୍‌ଲେକାମ୍ ଆୟ୍‌ୟ । ମାନ୍ ଇଶ୍‌ବର ରସିସ୍‌ମାନାଙ୍କ୍ ମାନାଡ଼୍ ବିଶ୍ୱାସ୍‌ତେ ତଡ଼୍ ଅନ୍ ନିର୍ଦ୍ଦେଶ୍ ପାଲନ୍ ମାଡ଼ିତୁଡ଼୍, ନୁ ଇଶ୍‌ବରତେ ମୁନ୍‌ନେ କ୍ରିଷ୍ଟନ୍ ଦାସ ଲେକାମ୍ ପ୍ରଚାର ମାଡ଼ିକାଡ଼୍ ।

୩

ପୁନେ ନିୟମ୍‌ତେ ଦାସ

୧ ମାନାଡ଼୍ ବାତେଏ ମେଣ୍ଟନ୍ ଦାମ୍ ଆମ୍‌ପ୍ରଣଂସା ମାଡ଼ାନଙ୍କ୍ ଆରାମ୍ ମାଡ଼ିତୁଡ଼୍ ? ବା ବେନ୍ ବେନଡ଼ ଲେକାମ୍ ବାତେଏ ମିଇ ପାକେ ବା ମିଇ ପାକାଙ୍କ୍ ମାୟାଦ୍ ପ୍ରସଂଶା ଚିଟି ଦରକାଡ଼୍ ?

୨ ମିଇଡେକେ ମା ପୁଡ଼ତେନଡ଼ି ଚିଟି, ମାମ୍‌ମେ ଜିଞ୍ଜୁଣ୍ଡାଗ୍ କେଡ଼ତାଦ୍ ଲିପି, ବେଦିଙ୍କ୍ ସାରେତଡ଼୍ ପୁଡ଼ତଡ଼୍ ନୁ କାରତେ ପାରତଡ଼୍ ।

୩ ଇଦ୍ ପରିଚୟ ଚିଟି କ୍ରିଷ୍ଟନ୍ ତଡ଼୍ କେଡ଼ତାଦ୍ ନୁ ମାନ୍ ତଡ଼୍ ଅନାଦ୍ ବିଷୟତେ ମାଡ଼ିତାଦ୍ । ଇଦ୍ କାରିଲାଦିନ୍ ତଡ଼୍ କେଡ଼ତାଦ୍ ଆୟ୍‌ୟ, ବାତେଙ୍ଗ୍ ଇଡ଼କେ ଜୀଞ୍ଜେମାନ୍ନାନ୍ ଇଶ୍‌ବରତେ ଆମ୍ବା ତଡ଼୍ ନାରିଡ଼୍ ଜିଞ୍ଜୁଣ୍ଡାଗ୍ ଲେକାଡ଼୍‌ତେ ।

୪ କ୍ରିଷ୍ଟନ୍ ଇସ୍ ଇଶ୍‌ବରତେ ପରୁ ଆଗେ ମାନ୍‌ନାଙ୍କ୍ ମାମ୍‌ମେ ଇଞ୍ଜୁସାରେ ମାଡ଼ିତୁମ୍,

୫ ମାମ୍‌ମେ ଯେ ନିଜେତାଦାଙ୍କ୍ ବାତେଏ ଉଦ୍‌ବାବନ୍ ମାଡ଼ାନଙ୍କ୍ ଇଚ୍ଛା, ଇଦ୍‌ଲେକାମ୍ ଆୟ୍‌ୟ, ମାଡ଼ର ମାୟାଦ୍ ଇଚ୍ଛା ଇଶ୍‌ବରତାଗେ;

୬ ନୂତନ୍ ନିୟମ୍‌ତିଙ୍କ୍ ମେଣ୍ଟେଅଡ଼ିଡ଼ାଗ୍ ମାନ୍‌ତଡ଼୍ ପ୍ରକାଶ୍ ମାଡ଼ାନ୍ ସେଙ୍ଗେ ଶକ୍ତି ଇଡ଼ତନ୍ । ଇଦ୍ ନିୟମ୍ କେଡ଼ତାଦ୍ ଆୟ୍‌ୟ, ମାଡ଼ର ଆମ୍ବାତଡ଼୍ ଲେକାଡ଼୍; ବାତେଙ୍ଗ୍ ଇଡ଼କେ କେଡ଼ତାଦ୍ ନିୟମ୍ ଡଲାଙ୍କ୍ ମାଡ଼ିଡ଼୍, ବାତେଙ୍ଗ୍ ଇଡ଼କେ ଆମ୍ବାତେ ନିୟମ୍ ଜିଞ୍ଜୁନ୍ ସଂସାର ମାଡ଼ିଡ଼୍ ।

୭ ମୋଶାନ୍ ନିୟମ୍ ସେବା ପାଡ଼ୁଛି ଅକର୍ତ୍ତବ୍ୟ କାଳ୍ପନେ ପରୁ
ଲେକ୍ତାଦ୍ ନିୟମ୍ ତିୟାର ଆଡ଼େତେବେଳେ ଇଶ୍ବରତେ ଗୌରବ
ପେୟସ୍ମାତ୍ତେ । ଆଦ୍ ଗୌରବ୍ ଖେଇସ୍ ଇକାଡ଼ ଆସ୍ମାତ୍ତକେବା
ମୋଶାନ୍ ଖେଇସ୍ତେ ପାକ୍ ଇସ୍ରାଏଲ୍ ନାରୁଡ଼୍ ଆଲ୍‌ସେପାର୍‌ଖେ
ମାଡ଼ତଡ଼୍ । ତଲ୍‌ନାଦ୍ ନିୟମ୍ ଯଦି ଇଲା ଗୌରବ୍ ପାଏମ୍ ଆଡ଼ତେ,

୮ ଆଲେକେ ପବିତ୍ର ଆମ୍ବାତେ ପାଡ଼ୁଛି ସାରରେ ଅନାଗାଙ୍କ୍ ବେସର୍
ଅଦିକ୍ ଗୌରବ୍ତେ ତିଆର୍ ଆଦ୍ତେ !

୯ ଦଣ୍ଡ ଇଦାନ୍ ନିୟମ୍ ସେବା ପାଡ଼ୁଛି ଯଦି ଇସର୍ ଗୌରବ୍
ଆଡ଼ତେ, ଆଲେକେ ଇଶ୍ବରତେ ପରିତ୍ରାଣ୍ ନିୟମ୍ ପ୍ରତିଷ୍ଠା ମେଣ୍ଡେ
ବେସର୍ ଗୌରବ୍ ଆୟ୍‌ୟ !

୧୦ ପାଃତ୍ରେ ନିୟମ୍‌ତାଦ୍ ମହିମା ପୁନାଦ୍ ନିୟମ୍‌ତାଗାଙ୍କ୍ ସୁଦୁର୍
ଆଡ଼ତେ ।

୧୧ ଯଦି ଆଦାନ୍ ବିଷୟ ଇସର୍ ଗୌରବ୍ ଆଡ଼ତେ, ସାରେଦିନାଦ୍
ବିଷୟ ଇଦିନାଗାଙ୍କ୍ ବେସର୍ ଗୁନ୍‌ତେ ଗୌରବ୍ କାଈଲି ଆଦ୍ତେ !

୧୨ ଆଦ୍ ଆଗେ ମାନନାଙ୍କ୍ ମାମ୍‌ମେ ଅଦିକ୍ ସାହାସ୍ ।

୧୩ ମାମ୍‌ମେ ମୋଶାନ୍ ଲେକାମ୍ ଇଲାମ୍ । ଅଣ୍ଡ୍ ତାନ୍ ମକମତିଙ୍କ୍
ମୁସିମାଡ଼ତନ୍, ବେଲାନ୍ ମୁରକ୍ ଆସ୍ ରାଲିମାଦାନ୍ ଆଦ୍ ଖେସ୍ତେ
ଅବସାନତେ ଇସ୍ରାଏଲ୍‌ତେ ନାରୁଡ଼୍ ଉଡ଼େ ପାର୍‌ଖଡ଼୍ ।

୧୪ ମୁନେଙ୍କ୍ ଅଡ଼ାଦ୍ ଆଞ୍ଜୁକାନ୍ ଶକ୍ତି ମାଈମାଡ଼ତେ । ଇଞ୍ଜେ ମିକା
ପାଃତ୍ରେ ନିୟମ୍ କାର୍‌ତାନ୍ ସମୟ୍‌ତେ ଅଡ଼ମୁନେ ଆଦ୍ ମୁସି ଆସ୍
ମାଡ଼ତେ । ଜିସୁ କ୍ରିଷ୍ଟନ୍ ତଡ଼୍ କାଈଲି ମାନନାଙ୍କ୍ ମାତର୍ ଆଦ୍ ଆବରନ୍
ଉନ୍ନୋରିଡ଼୍ ଆଦ୍ତେ ।

୧୫ ନେଣ୍ଡ୍ ମିକା ମୋଶାନ୍ ବ୍ୟବସ୍ଥା କାର୍‌ସମାଦାନ୍ ଖେଲେ ଅଡ଼ାଦ୍
ମନ୍ ପରୁ ମାନ୍‌ତେ ଖେରଡ଼୍ ଆବରନ୍ ।

୧୬ ବାତେଙ୍କ୍ ଇଡ଼କେ ଦର୍ମଶାସ୍ତ୍ର କେଡିଡ଼୍, “ବେନଡ଼୍ ଇଶ୍ବରତେ
ପାକେ ମାଲ୍‌ଦତଡ଼୍, ଅଡ଼ାଦ୍ ଲେକେତାଦ୍ ସିଲ୍ ମୁସିଡ଼ତାଦ୍ ତନ୍‌ଖେ
ପାର୍‌ତେ ।”

୧୭ ଇଦ୍ ଶାସ୍ତ୍ରାଂଶତାଗ୍ ଲେକାମିନ୍ତେ, “ପ୍ରବୁ,” ଆଦୁତନ୍ “ଆମ୍ ।”
ବେଗେ ପ୍ରବୁନ୍ ଆମ୍ବା, ଆଗେ ମାନ୍‌ତେ ସ୍ବାଦିନତା ।

୧୮ ମାନାଡ଼୍ ସାରେତଡ଼୍ ମକମ୍‌ତେ ଦାର୍ପୁନ୍‌ତାଗ୍ ଉଡ଼ାନ୍ ଲେକାମ୍

ପ୍ରବୁନ୍ ଗୌରବ ତଅନ୍ଦୁତ ନୁ ପ୍ରବୁନାଗାଙ୍କ ପେୟତାଦ୍ ଆଦ୍ ମାଲମାତେ ତଡ୍ ମାନାଡ୍ କାମ୍ବକେ ଲେକାମ୍ ଅନ୍ ରକମ୍ ବାଦ୍ଲେମ୍ ଆଦୁତେ ।

୪

ସୁସମାଚାରତେ ଝେସ୍

୧ ଇଶ୍ବର ଅନୁଗ୍ରହ ମାଡି ମାନ୍ ଇଦ୍ ସେବା ପାଡ଼ି ଇସମାନାଙ୍କ ମାନାଡ୍ ଆୟ ଖାଡ୍ ।

୨ ମାତର୍ ମାମ୍ବେ ସିଗ୍ ଆଦାନାଦ୍ ନୁ ମିଞ୍ଜିମାନ୍ ବିଷୟସାରେ ଝିଡ଼ସ୍ତମ୍; ମାମ୍ବେ ଚଲନା ମାଡ଼ମ୍ କି ଇଶ୍ବରତେ ବାକ୍ୟତେ ବିକୃତ ଅର୍ଥ ମାଡ଼ମ୍ । ବାତେଙ୍କ ଇଡ଼କେ ସାରେତଡ଼ ନିଜମ୍ ସଡ଼ କେଞ୍ଜିତେ ଲେକାମ୍ ଇଶ୍ବରତେ ମୁନେ ନାରିଡ଼ ମନ୍ ପାକେ ମାମ୍ବେ ନିଜେ ନିଜେତେ ଯୋଗ୍ୟତା ପ୍ରମାମ୍ ମାଡ଼ାନ୍ ସେଙ୍ଗେ ଆଲ୍ ସି ମାଡ଼ତୁମ୍;

୩ ବାତେଙ୍କଇକେ ମାନ୍ ତଡ଼ କେସମାନ୍ ସୁସମାଚାର ଯଦି ରହସ୍ୟାବୃତ୍, ଆଲେକେ ମାତର୍ ତଡ଼ ଆଦାନଡ଼କ୍ ସେଙ୍ଗେ ଆଦ୍ ରହସ୍ୟାବୃତ୍ ।

୪ ଅଡ଼ ବିଶ୍ବାସ ମାଡ଼ତୁ, ବାତେଙ୍କଇକେ ଅଡ଼ ମନ୍ତିଙ୍କ ଇଦ୍ ଜଗଡ଼ ନାରୁଡ଼କିଙ୍କ ଶୟତାନ୍ କାନାଲ୍ ମାଡ଼ିତେ । ମେଣ୍ଡେ ଇଶ୍ବରତେ ସାରେ ବିଷୟ କ୍ରିଷ୍ଟନ୍ ମାହିମାନିତ ସୁସମାଚାରତେ ଝେସ୍ ଅଡ଼ ପାକ୍ ଝେସ୍ ଆୟ ।

୫ ମାମ୍ବେ ମା ବିଷୟତେ ପ୍ରଚାର ମାଡ଼ମ୍, ବାତେଙ୍କ ଇଡ଼କେ ମାମ୍ବେ ଜିସୁ କ୍ରିଷ୍ଟଙ୍କ ପ୍ରବୁ ଇଞ୍ଜ ପ୍ରଚାର ମାଡ଼ତୁମ୍ ନୁ ଜିସୁନ୍ ସେଙ୍ଗେ ମାମ୍ବେ ନି ଦାସ ଆଡ଼ତମ୍,

୬ ବାତେଙ୍କ ଇଡ଼କେ ବେନ୍ ଇଶ୍ବର କେସମାଡ଼ତନ୍, “ଇକାଡ଼ ତାଗ୍ ଝେସ୍ ସାରେପାକ୍ ଆୟି,” ଆଦ୍ ଇଶ୍ବର ଜିସୁନ୍ ମକତାଗ୍ ସାରେପାକ୍ ଐଶ୍ବରିକ୍ ମାହିମା ଉଡ଼ାନ୍ ସେଙ୍ଗେ ମା ହୃଦୟତିଙ୍କ ଝେସ୍ ମାଡ଼ତୁଣ୍ ।

୭ ମାମ୍ବେ ମାତର୍ ମାୟାଦ୍ ସାଦାରନ୍ ପେଣ୍ଡୁଲୁ କୁଣ୍ଡେତାଗ୍ ଇଦ୍ ସର୍ଗତେ ସମ୍ପଦ ଦରକୁଡ଼ । ଆଗାଙ୍କ ପ୍ରମାନ୍ ଆଡ଼ତେ ଯେ, ଇଦ୍ଲେକାମ୍ ଝେସ୍ତେ ଶକ୍ତି ମାୟାଦ୍ ଆୟୟ, ମାତର୍ ଇଶ୍ବରତାଦ୍ ।

୮ ମାମ୍ମେ ସାରେ ଲେକାଡ଼ କଷ୍ଟ ପାଏମ୍ ଅଦୁତମ୍, ବାତେଙ୍କ ଇଡ଼କେ ମୁର୍ମୁରା ଆୟମ୍ । ବେସୁଙ୍କ ବିଚଳିତ୍ ଅଦୁତମ୍ ବାତେଙ୍କ ଇଡ଼କେ ମାମ୍ମେ ଆୟମ୍ ।

୯ ମାମ୍ମେ ତାଡ଼ନା ପାଏମ୍ ଆଡ଼ତମ୍, ବାତେଙ୍କ ଇଡ଼କେ ଇଶ୍ବର ମାକିଂଙ୍କ ବେସୁଙ୍କ ଓଡ଼ସଣ୍ । ନାର୍ଗେ ଦାମ୍ ମାମ୍ମେ ଦେବ୍ ତିଡ଼ତମ୍, ବାତେଙ୍କ ଇଡ଼କେ ଦୁଂସ ଆୟମ୍ ।

୧୦ ମାମ୍ମେ ସାରେଦାମ୍ ମାନ୍ ମେନ୍ଦୁଲ୍ତାଗ୍ ଜିସୁନ୍ ଡଲ୍ତାଦ୍ ହେର୍କା ମାଡ଼ତୁମ୍ । ଜିସୁନ୍ ଜୀଞ୍ଜୁନ୍ ବେଲାନ୍ ମାୟାଗେ ପ୍ରକାଶିତ୍ ଆଦତେ,

୧୧ ଅନ୍ ଜୀଞ୍ଜେତିଙ୍କ ଇଦ୍ ନାୟାଦ୍ ମେନ୍ଦୁଲ୍ତାଗ୍ ପ୍ରକାଶ୍ ମାଡ଼ାନ୍ ସେଙ୍ଗେ ଜିସୁନ୍ ସେଙ୍ଗେ ସାରେ ଜୀଞ୍ଜୁଣ୍ ମାମ୍ମେ ଡଲ୍ତେ ଲେକାମ୍ ଅଦୁତମ୍ ।

୧୨ ଇଦ୍ଲେକାମ୍ ମାୟାଗେ ଡଲ୍ତାଦ୍ ନୁ ମିଇ ପାକେ ଜିଞ୍ଜୁଣ୍ ପାଡ଼ୟି ମାଡ଼ତ୍ ଆଦୁଡ଼ତେ ।

୧୩ ଦର୍ମଶାସ୍ତ୍ରତାଗ୍ ଲେକାମିନ୍ଦେ, “ନାନ୍ ବିଶ୍ବାସ୍ ମାଡ଼ତାଙ୍କ୍ ଗଟି ତିରନ୍ଦୁତାନ୍ ।” ମାମ୍ମେ ଆଦ୍ ବିଶ୍ବାସ୍ତେ ଆମ୍ ଦରସ୍ତମ୍ । ମାମ୍ମେ ବିଶ୍ବାସ୍ ମାଡ଼ତୁମ୍, ଆଦିଙ୍କ୍ ମାମ୍ମେ କେଡୁତମ୍ ।

୧୪ ମାମ୍ମେ ପୁଡ଼ତମ୍, ଇଶ୍ବର ପ୍ରବୁ ଜିସୁଙ୍କ୍ ଡଲ୍ତାଗାଙ୍କ୍ ତେସ୍ମିନ୍ଦେନ୍ । ଆଦ୍ ଇଶ୍ବର, ଜିସୁନ୍ ତଡ଼୍ ମାକିଂଙ୍କ୍ ମିକା ଜିଞ୍ଜୁନ୍ ମାଡ଼ିତନ୍ ନୁ ମିଇ ତଡ଼୍ ମାକିଂଙ୍କ୍ ତାନ୍ ମୁନେ ନିଲ୍ପିତନ୍ ।

୧୫ ମିୟାଦ୍ ସାୟେଡ଼ ସେଙ୍ଗେ ଇଦ୍ସାରେ ଆଦୁଡ଼ତେ । ଆଦିଙ୍କ୍ ଇଶ୍ବରତେ ଅନୁଗ୍ରହ ମେଣ୍ଡେ ପେର୍କେତାଗାଙ୍କ୍ ଅଦିକ୍ ନାର୍ଗେଆଦାନ୍ ସଙ୍ଗେ ନାରୁଡ଼କ୍ ଇଡ଼ତଣ୍, ମେଣ୍ଡେ ନାର୍ଗେ ଦନ୍ୟବାଦ୍ ଲେକାମ୍ ଇଶ୍ବରତେ ଗୌରବ୍ ମାଡ଼ିତଡ଼ ।

ବିଶ୍ବାସ୍ତେ ଜିଞ୍ଜୁନ୍

୧୬ ଆଦିନ୍ ସେଙ୍ଗେ ମାମ୍ମେ ବେସୁଙ୍କ୍ ବା ଦୁଃକାମ୍ ଆୟମ୍ । ମାନ୍ ମେନ୍ଦୁଲ୍ ଜାମ୍ଜାମ୍ ଲପ୍ ଆଦୁଡ଼ାଡ଼ । ବାତେଙ୍କ୍ ଇଡ଼କେ ମାୟାଦ୍ ଲୋପେଡ଼ ଆମ୍ ଦିନାଲ୍ ଦିନାଲ୍ ଲେକାମ୍ ଆଦୁଡ଼ତେ ।

୧୭ ଇଦ୍ ସାମାନ୍ୟ ନୁ ସେନେକ୍ତାଦ୍ ଦୁଃକାମ୍ କଷ୍ଟ ମାନ୍ ସେଙ୍ଗେ ତାଡ଼ତ୍ ସାରେଦିନାତାଦ୍ ଗୌରବତାଦ୍ ସମ୍ପତି ।

୧୮ ମାନ ଉଡାନ କଣ୍ଢେତେ ବାତେବା ବସ୍ତୁ ପରୁ ଆୟୟ, ମାତର ସାୟେଡ଼ ଜିନିଷ୍ଟେ ପରୁ ମଣ୍ଡି, ବାତେଙ୍କ ଇଡ଼କେ ଉଡାନାଉ ସାରେ ବାତା ଦୁଡ଼ା, ବାତେଙ୍କ ଇଡ଼କେ ବାଡ଼ ଉଡାନାଦ୍, ଆଦ୍ ଚିରସ୍ଥାୟୀ ।

୫

୧ ମାନାଡ଼, ପୁଡ଼ତାଡ଼, ଯେ, ବେନ୍ ପାତର୍ବ୍ ମେନ୍ଦୁଲ୍ ଲେକାମ୍ ତମ୍ବୁତେ ମାନାଡ଼, ଇଞ୍ଜେ ମିନ୍ଦେ, ଆଦ୍ ଦ୍ଵଂସ ଆଡ଼କେ, ମାନ ଇଶ୍ଵର ସ୍ଵର୍ଗତାର୍ ସ୍ଵେରଡ଼ ସାରେଦିନାଡ଼ ଡ଼ାଦ୍ ଲନ୍ ନେହେତିସ୍ ମିନ୍ଦେନ୍ ।

୨ ମାନାଡ଼, ପୃତିବିତାର୍ ମାଞ୍ଜି ସ୍ଵର୍ଗତାର୍ ମାନ୍ଦାନ୍ ଲୋନ୍ ଲେକାଡ଼ ତକାସିଲେ କେରଦାନଙ୍କ ତିପାଲ୍ ଆଦୁତାଡ଼ ।

୩ ବାତେଙ୍କ ଇଡ଼କେ ଆଦ୍ ସ୍ଵର୍ଗତେ ଲୋଡ଼ତାର୍ ନେଙ୍କକେ, ମାନାଡ଼, ବାଣ୍ଡା ତନ୍ଦ୍ରାଡ଼ ।

୪ ମାନାଡ଼, ଇଦ୍ ପୃତିବି କୁଣ୍ଡେତାର୍ ମାନ୍ଦାନ୍‌ସେଲେ ଗାଟି ତିପାଲ୍‌ତେ ଜିଞ୍ଜୁଣ୍ଡତଡ଼, କେୟମାଡ଼ତମ୍ । ପୃତିବି ମେନ୍ଦୁଲ୍ ନିଡ଼ତାନାଦ୍ ମାନ ଇଚ୍ଛା ଆୟୟ, ମାତର ମାନ ଆଲ୍‌ସୁତମ୍, ସ୍ଵର୍ଗତାଡ଼ ତକାସିଲେ କେରକେ ମାୟାଦ୍ ଇଦ୍ ଡ଼ଲାନ୍ ମେନ୍ଦୁଲ୍ ବେଲାନ୍ ଅମର୍ ଆଦତେ ।

୫ ଇଶ୍ଵର ମାକିଙ୍କ ଇଦ୍ ପରିବର୍ତ୍ତନ୍ ସେଙ୍ଗେ ତିଆର୍ ମାଡ଼ତଣ୍ । ମେଣ୍ଡେ ଇଦିନ୍ ସାରେ ଲେକାମ୍ ତାନ୍ ପବିତ୍ର ଆମ୍ବାତିଙ୍କ ଅଣ୍ ମାନ ଦାନ ମାଡ଼ତଣ୍ ।

୬ ଆଦିନ୍ ସେଙ୍ଗେ ମାମ୍‌ମେ ସାରେଦାମ୍ ସାହାସ୍ ପଇଡ଼ତମ୍ । ମାମ୍‌ମେ ପୁଡ଼ତମ୍, ବେସ୍ ଦିନା ମାମ୍‌ମେ ଇଦ୍ ମେନ୍ଦୁଲ୍‌ତେ ମାନତମ୍, ଆସର୍ ଦିନା ପ୍ରବୁନାଗେ ଜାକେମାଞ୍ଜି ବାଦ୍‌କତମ୍,

୭ ବାତେଙ୍କଈକ୍ ମାନାଡ଼, ଉଡାନ ଲେକାମ୍ ଜିଞ୍ଜୁଣ୍ଡ ବାଦ୍‌କମ୍, ମାତର ବିଶ୍ଵାତଡ଼ ଜିଞ୍ଜୁନ୍ ବାଦାକୁତମ୍ ।

୮ ଆଦିଙ୍କ ମାମ୍‌ମେ ସାହାସ୍‌ତଡ଼, ମେଣ୍ଡେ ଇଦ୍ ମେନ୍ଦୁଲ୍ ଷ୍ଟିଡ଼ସି ମିକା ପ୍ରବୁନ୍ ତଡ଼ ମାନ୍ଦାନ୍ ସେଙ୍ଗେ ମାମ୍‌ମେ ଅଦିକ୍ ସାଡ଼ଦେ ।

୯ ଆଦିନ୍ ସେଙ୍ଗେ ଇଗେ ନିଜେର ଲୋନ୍ ମାନିଣ୍ଡ ବା ମେଣ୍ଡୁଲ୍‌ଲନ୍ ମାନିଣ୍ଡ, ଇଶ୍ଵରତିଙ୍କ ଶାନ୍ତି ମାଡ଼ାନାଦ୍ କେ ମାୟାଦ୍ ସ୍ଵେରଡ଼ ଇଚ୍ଛା ।

୧୦ ☆ବାତେଙ୍କଇକ୍ତେ ମାକିଂଙ୍କ ସାରେତଡ଼କ୍ ଅନ୍ ତଡ଼ ବିଚାର୍ ଆଦାନ୍ ସେଙ୍ଗେ ନିଜାମ୍ କ୍ରିଷ୍ଟନ୍ ମୁନେ ଉପସ୍ଥିତ୍ ଆଦାନଙ୍କୁ ଖେଇଡିଡ଼ । ଆସୁଙ୍କୁ ତଲାନ୍ ମେନ୍ଦୁଲ୍ ମାନାଡ଼୍ ମାଡ଼ିମାନ୍ଦାନ୍ ସାୟେତାଦ୍ ବା ପିନ୍ଦଲାଦ୍ ମେନ୍ଦୁଲ୍ତେ, ସାରେ ପାଡ଼ିୟିଦେ ଲେକାଡ଼୍ ମାନାଡ଼୍ କାୟେ ଦସିକି ଆଦତାଡ଼୍ ।

କ୍ରିଷ୍ଟନ୍ ତଡ଼୍ ଇଶ୍ବର ତଡ଼୍ ସାଙ୍ଗ

୧୧ ପ୍ରବୁଙ୍କୁ ଖେରଦାନାଦ୍ ଇଡ଼କେ ବାଡ଼ତେ, ମାନାଡ଼୍ ପୁଡ଼ତାଡ଼୍ ନୁ ଇଦ୍ ମାଡ଼ାନ୍ ସେଙ୍ଗେ ମାନାଡ଼୍ ସାରେତଡ଼କିଂଙ୍କୁ କେଡୁତାଡ଼୍ । ଇଶ୍ବର ମାନ୍ ସାରେତଡ଼୍ ଲେକେଡ଼ତେ ପୁଡ଼ତଣ୍ । ନାନ୍ ଆଗେ ମାଡ଼ୁତାନ୍, ମିୟାଦ୍ ମନ୍ତାଗ୍ ମିଡ଼୍ ନାକିଂଙ୍କୁ ଲେକେଡ଼ତେ ପୁଡ଼ତିଡ଼୍ ।

୧୨ ମାମ୍ମେ ମେଣ୍ଡନ୍ ଦାମ୍ ମିଇପାକେ ଗର୍ବ ମାଡ଼ାନଙ୍କୁ ଇଛା ମାଡ଼ମ୍ । ଇଡ଼କେ ମା ବିଷୟତେ ନିଜାତାଦ୍ ଦର୍ପ ମାଡ଼ାନ୍ ସେଙ୍ଗେ ମିକିଂଙ୍କୁ ସୁଯୋଗ୍ ଇଦାନ୍ ମାଞ୍ଜାଦ୍ ପାଡ଼ିୟି । ଆଲେକେ ଲୋପେଡ଼ ଗୁନାମ୍ତିଙ୍କୁ ଉଡ଼କଟ୍ ମାତର ବାଇଦେ ଉଡ଼ିମିକା ବେନଡ଼୍ ଦର୍ପ ମାଡ଼ିତଡ଼୍ ଅଡ଼କିଂଙ୍କୁ ସାୟେଡ଼ ଉଡ଼ର ଇଦାଙ୍କୁ ପାର୍ଦତିନ୍ ।

୧୩ ମାମ୍ମେ ମଣ୍ଡିମ୍, ଆଦ୍ ଇଶ୍ବରତେ ସେଙ୍ଗେ; ସସୁବୋଦ, ଆଲେକେ ମିଇ ସେଙ୍ଗେ ।

୧୪ କ୍ରିଷ୍ଟନ୍ ପ୍ରେମ ତଡ଼୍ ମାମ୍ମେ ମିନ୍ଦେମ୍ । ମାମ୍ମେ ବୁଜେମ୍ ଆଡ଼ତମ୍ ଯେ, ଖେରଣ୍ ସାରେତଡ଼୍ ସେଙ୍ଗେ ତଲିମାନ୍ନାଙ୍କୁ ସାରେତଡ଼୍ ଅନାଦ୍ ତଲ୍ତାଗ୍ କାଇଲ୍ତଡ଼୍ ।

୧୫ ଅଣ୍ ସାରେତଡ଼୍ ସେଙ୍ଗେ ତଲିମାନ୍ନାଙ୍କୁ ବେନଡ଼୍ ଜୀଞ୍ଜୁନ୍ ମିନ୍ଦେ, ଅଡ଼୍ ମେଣ୍ଡେ ନିଜେଡ଼୍ ସେଙ୍ଗେ ଜୀଞ୍ଜୁନ୍ ଆୟ୍ଖେ ଅନ୍ ସେଙ୍ଗେ ଗେଲ୍ସିତଡ଼୍ ବାତେଙ୍କଇକ୍ତେ ଅଡ଼୍ ସେଙ୍ଗେ ଅଣ୍ ତଲି ମେଣ୍ଡେ ଜିଖେ ଆସ୍ ମିନ୍ଦେମ୍ ।

୧୬ ମାମ୍ମେ ମେଣ୍ଡେ ବେନଙ୍କୁ ନାରୁଡ଼୍ ଲେକାମ୍ ବିଚାର୍ ମାଡ଼ମ୍ । ଦିନାମ୍ ମାଡ଼ତେ, ବେସୁଙ୍କୁ ମାମ୍ମେ କ୍ରିଷ୍ଟଙ୍କୁ ମିକା ନାରୁଡ଼୍ ଲେଲାମ୍ ବିଚାର୍ ମାଡ଼ମାଡ଼ତମ୍ । ବାତେଙ୍କୁ ଇଡ଼କେ ଇଞ୍ଜେ ମେଣ୍ଡେ ମାମ୍ମେ ଆଲାନ୍ ମାଡ଼ମ୍ ।

୧୭ କ୍ରିଷ୍ଣନ୍ ତତ୍ କାଲ୍ଲକେ, ନାରୁନାଦ୍ ପୁନେ ତିଆର୍ ଆଦତେ ।
ପାଃକ୍ତେ ବିଷୟସାରେ ମାଲ୍ ଆଦତେ, ପୁନେତାଉ ତିଆର୍ ଆଦତେ ।

୧୮ ଇଝୁସାରେ ଇଶ୍ବରତେ ପାଡ଼ୁୟି । ଅଣ୍ କ୍ରିଷ୍ଣନ୍ ତତ୍ ମାନ୍
ଅନ୍ ତତ୍ ମେଣ୍ଡୁନନ୍ଦାମ୍ କାୟଲ୍ତମ୍ ନୁ ଅନ୍ ତତ୍ ବାଗାତତ୍ତେ
ମେଣ୍ଡୁନନ୍ଦାମ୍ କାଲ୍ପାନ୍ ସେଙ୍ଗେ ଅଣ୍ ମାକିଂଙ୍କ୍ ମେଣ୍ଡେ ବାଗାତତ୍ତକିଙ୍କ୍
ସାଙ୍ଗ୍ ମାଡ଼ାନଙ୍କ୍ ଦାୟିତ୍ବ ଇଡ଼ତନ୍ ।

୧୯ ଆଦିଙ୍କ୍ ମାୟାଦ୍ କାବୁର୍ ଆଦୁଡ଼ତେ, ଇଶ୍ବର କ୍ରିଷ୍ଣନ୍ ତତ୍ ସାରେ
ମାନବ୍ ଜାତିତିଙ୍କ୍ ଅନ୍ ତତ୍ କାଲ୍ପାନ୍ଙ୍କ୍ ତିଆର୍ ମାଡ଼ିମିନ୍ଦେଣ୍ ।
ତାନ୍ ବିରୁଦ୍ତେ ଅଡ଼ାଦ୍ ଅପରାଦ୍ତିଙ୍କ୍ ଅଣ୍ ମେଣ୍ଡେ ତାନ୍ ହିସାବ୍ତେ
ନେଝଣ୍ । ମେଣ୍ଡେ, ଇଦ୍ ମେଣ୍ଡେ କାଲ୍ଲାନାଦ୍ କାବୁର୍ କେତାନାଦ୍
ଦାୟିତ୍ବ ମା ପରୁ ଇସ୍ ମିନ୍ଦେଣ୍ ।

୨୦ ମାମ୍ମେ କ୍ରିଷ୍ଣନ୍ ପାକେଙ୍କ୍ ଇଦ୍ ଗର୍ କେଡୁତମ୍ । ସ୍ବୟଂ ଇଶ୍ବର
ମା ତତ୍ ଇଦ୍ ଗର୍ ଇଡ଼ତନ୍ ଇଞ୍ଜି ଏକା ମାଡ଼ଙ୍କ୍ ଆଦତେ । କ୍ରିଷ୍ଣନ୍
ପାକେଙ୍କ୍ ମାମ୍ମେ ବିନତି ମାଡ଼ତୁମ୍, ଗଡୁତାଗାଙ୍କ୍ ସାଙ୍ଗ୍ ଆୟ୍ମୁର୍ ।

୨୧ ବାତେଙ୍କ୍ ଇଡ଼କେ ବେନନାଗେ ପାପ୍ ଇସ୍ବର ମିକା ଇଲ୍ଲେଝେ
ମାଡ଼କେ, ଅଂକିଙ୍କ୍ ଅଣ୍ ମାନ୍ ସେଙ୍ଗେ ପାପ୍ ବଲି ଲେକାମ୍ ମାଡ଼ତଣ୍,
ବେଲାନ୍ ମାନାଡ଼ ଅନ୍ତତ୍ ଇଶ୍ବରତେ ଦାମାମ୍ ଲେକାମ୍ ଆଦିକାଡ଼ ।



୧ ଇଶ୍ବରତେ ସେଙ୍ଗେ ଅଣ୍ଡୟାଗେ ପାଡ଼ୁୟି ମାଡ଼ମାନାଙ୍କ୍ ମାମ୍ମେ
ମିକିଂଙ୍କ୍ ବିନତି ମାଡ଼ତୁମ୍, ମିଲ୍ ଜିଝୁଣ୍ଡତାଗ୍ ଇଶ୍ବରତେ ଅନୁଗ୍ରହ
ଆଙ୍ଗଡ଼ାମ୍ ମାଡ଼ମାଟ୍ ।

୨ ବାତେଙ୍କ୍ ଇଡ଼କେ ଅଣ୍ କେଡ଼ତାନ୍, “ଇଶ୍ବର ବାଡ଼ କେତିତିଣ୍
ଆଦ୍ କେଞ୍ଜାଟ୍, ମାମ୍ମେ ଅନୁଗ୍ରହ ସମୟତେ ମିୟାଦ୍ ପାର୍ତନା
କେଞ୍ଜତମ୍, ମେଣ୍ଡେ ପରିତ୍ରାଣତେ ଦିନାତେ ମାମ୍ମେ ମିକିଂଙ୍କ୍
ସାହାୟ୍ୟ ମାଡ଼ତମ୍ ।” କେଞ୍ଜାଟ୍, ଇଞ୍ଜେ ମହା ଅନୁଗ୍ରହତେ ଦିନାମ୍;
କେଞ୍ଜାଟ୍, ଇଞ୍ଜେ ପରିତ୍ରାଣତେ ଦିନାମ୍ ।

୩ ବେଲାନ୍ ମାନ୍ ପାଡ଼ୁୟିତାଗ୍ ମେଣ୍ଡେବାଗାତତ୍ ବେନଗାଲା ଦକ୍ଷି
ଆୟ୍ମାକିଣ୍ଡ, ଆଦିନ୍ ସେଙ୍ଗେ ମାମ୍ମେ ବାତେଏ ବିଷୟତେ ବାଦା
ଆୟ୍ମାମ୍,

୪ ମାତର, ମାମ୍ମେ ସାରେ ଦିନାମ୍ ନିଜେତିଙ୍ଗ ଇଶ୍ବରତେ ଦାସ ଲେକାମ୍ କେସମିନ୍ଦେମ୍ । ନାରଗେ ଦୈର୍ଯ୍ୟତତ୍ ମାମ୍ମେ ସାରେପକାର ଦୁଃକାମ୍, ଅବାବ୍ ନୁ ତିପାଲ୍ ସାରେ ମାଡ଼ତୁମ୍;

୫*ମାମ୍ମେ ଦେବ୍ ତିଡ଼ତମ୍, ଜେଲ୍ଦଣ୍ଡ ଆଡ଼ତମ୍, ନାରୁଡ଼୍ ମୁନେ ନିନ୍ଦ୍ ଆଡ଼ତମ୍; ନାରକେଡ଼ ପାୟାଲ୍ ତିପାଲ୍ ଆଡ଼ତମ୍, ଉସ୍କାଡ଼୍ ଉଞ୍ଜକଟ ମାଡ଼ତମ୍ ନୁ ଉପାସ୍ତେ କାଟେମ୍ ଆଡ଼ତମ୍ ।

୬ ମାୟାଦ୍ ପବିତ୍ରତା, ବୁଦ୍ତେ, ଗାଡ଼ସ୍, ଦୟା, ସାୟେତାଦ୍ ପ୍ରେମ୍ ନୁ ସତ୍ୟତେ କାରୁର ସେଙ୍ଗେ ପବିତ୍ର ଇଶ୍ବରତେ ଶକ୍ତି ତତ୍ । ମାମ୍ମେ ଇଶ୍ବରତେ ଦାସ ଇଞ୍ଜ ପରିଚୟ ଇଡ଼ତମ୍,

୭ ଶତୁନଡ଼୍ ବିରୁଦ୍ଧତେ ଲଡ଼େମ୍ ଆଦାଙ୍ଗ୍ ନିଜାମ୍ ସଡ଼ ମାୟାଦ୍ ବେଡ଼ିୟି ଅସ୍ତ୍ର ।

୮ ମାମ୍ମେ ସମ୍ମାନିତ୍ ନୁ ଅପମାନିତ୍ ଅଦୁତମ୍, ପ୍ରଶଂସିତ୍ ନୁ ସିଗ୍ ଆଡ଼ତମ୍, ମାକିଙ୍ଗ୍ ମିର୍ ଇଞ୍ଜ କେଡ଼ତଡ଼୍, ଯଦି ମାନାଡ଼୍ ନିଜାମ୍ କେଡୁତଡ଼୍ ।

୯ ମାମ୍ମେ ପୁତ୍ତେନମ୍ ଆଡ଼କେ ମିକା ପୁନ୍ଦ୍ରେନମ୍, ଜାଞ୍ଜେମାଞ୍ଜ୍ ମିକା, ତଲ୍ଲତମ୍ ଇଞ୍ଜ କେଡିତଡ଼୍ । ମାମ୍ମେ ଦଣ୍ଡ୍ ଆଡ଼ତମ୍, ବାତେଙ୍ଗ୍ ଇଡ଼କେ ତଲମ୍ ।

୧୦ ମାମ୍ମେ ଦୁଃକାମ୍ ତଡ଼୍ ମାଡ଼କେ ମିକା ସାରେଦାମ୍ ଶ୍ରେଡ଼କିତମ୍ । ମାମ୍ମେ ଗରିବ୍ ଲେକାମ୍ ତନ୍ତୁତମ୍, ବାତେଙ୍ଗ୍ ଇଡ଼କେ ନାରଗେ ନାରୁଡ଼୍ ସାଉକାର ମାଡ଼ତମ୍ । ମାୟାଦ୍ ବାତେଏ ଇଲ୍ଲେ ଲେକାମ୍ ଏକେ ଆଦତେ, ବାତେଙ୍ଗ୍ ଇଡ଼କେ ବାସ୍ତବତେ ମାମ୍ମେ ସାରେତାଞ୍ଜିନ୍ ଅଦିକାରିମ୍ ।

୧୧ ହୋ କରକ୍ତିୟ ସାଙ୍ଗନଡ଼ି, ମାମ୍ମେ କପାମ୍ ଇଲ୍ଲେ ଲେକାମ୍ ମିକିଙ୍ଗ୍ ସାରେ କେସମିନ୍ଦେମ୍ । ମିଲ୍ ଗାରେ ମାୟାଦ୍ ହୃଦୟ୍ ତେରସିଡ଼ତମ୍ ।

୧୨ ମାମ୍ମେ ମିଲ୍ ସେଙ୍ଗେ କଷ୍ଟ ହୃଦୟ୍ ଆୟମ୍, ଇଡ଼କେ ମିୟାଦ୍ ହୃଦୟ୍ ମା ସେଙ୍ଗେ କଷ୍ଟ ଆଡ଼ତେ ।

୧୩ ମିକିଙ୍ଗ୍ ନା ପିଲା ଇନା ଏକାମାଡ଼ି ଇଞ୍ଜୁସାରେ କେଡୁତାନ୍ । ମାମ୍ମେ ଉଦାର ମାଲ୍ପିଦାନ୍ ଲେକାମ୍ ମିୟାଦ୍ ହୃଦୟ୍ ତେର୍ସ୍ ଆୟି ।

ବିଶ୍ୱାସ ଇଲ୍‌କ୍ସେ ତତ୍ କାଲ୍‌ମାଟ୍

୧୪ ବେନତ୍, କ୍ରିଷ୍ଟଙ୍କ ବିଶ୍ୱାସ ମାଡ଼ତ୍, ମିଡ଼, ତତ୍, କାଲ୍‌ଲି ପାଡ଼ୟି ମାଡ଼ାନଙ୍କ ଆଲ୍‌ସି ମାଡ଼ମାଟ୍ । ଇଦ୍ ବେସୁଙ୍କ ବା ଆଦେପାର୍ସି । ସାୟେ ନୁ ଅପରାଦ୍ ବେଗେ କାଲ୍‌ଲାନାଦ୍ ? ଖେସ୍ ନୁ ଇକାଡ଼, ବେଲାନ ଅଣ୍ଡୟାଗେ ମାନନ୍ତା ?

୧୫ କ୍ରିଷ୍ଟ ନୁ ଶୟତାନ ବେଲା ଝେରତ୍, ମାନ ଆଦତେ ? ବିଶ୍ୱାସୀ ତତ୍ ଅବିଶ୍ୱାସି ବେନ ବିଷୟତେ ଝେରତ୍, ମାନ ଆଦଦେ ପାର୍‌ତତ୍ ?

୧୬ ☆ ଇଶ୍ୱରତେ ମନ୍ଦିରତାଗ୍ ବେଲାନ ପୁଡ଼ଲାନ ପ୍ରତିଷ୍ଠା ଆଦଦେ ପାର୍‌ଦେତେ ? ମାନାଡ଼, ତ ଜୀଝେମାନ୍‌ଲାନ ଇଶ୍ୱରତେ ମନ୍ଦିର, ବାତେଙ୍କ ଇଡ଼କେ ଇଶ୍ୱର ନିଜେ କେଡ଼ତାନ, “ନା ନାରିଡ଼ତ ନାନ ବାଦ୍‌କିତାନ ନୁ ଅଡ଼ତଡ଼ ଉଡ଼ିତାନ; ନାନ ଅଡ଼ ଇଶ୍ୱର ଆଦତନ୍ ନୁ ଅଡ଼, ନା ନିଜେଡ଼ ନାରୁଡ଼ ଆଦତଡ଼ ।”

୧୭ ଆଦିଙ୍କ ପ୍ରୁ କେଡ଼ିତଣ୍ଡ, “ଅଡ଼ଆଗାଙ୍କ ମିଡ଼, ପେଇସ୍ ଝାଡ଼ାଟ୍, ଅଡ଼ଆଗାଙ୍କ ମିଡ଼, ଝେରେ ଆୟ୍‌ମୁଟ୍ । ଅଶୁଚି ବିଷୟ ତତ୍ ସମ୍ପକ୍ ନେହେମାଟ୍, ଆଲେକେ ନାନ ମିକିଂଙ୍କ ନେଃଏଡ଼ିତାନ,

୧୮ ନାନ ମିଲ ବାବାନ୍ ଆଦତନ୍, ମେଣ୍ଡେ ମିଡ଼, ନା ମାର୍‌କ୍ ଆଦଡ଼ିଡ଼, ନୁ ମାୟାସ୍, ସାରେତିଙ୍କ ଶକ୍ତିନଡ଼, ପ୍ରୁ ଇଦ୍ ଗର୍ କେଡ଼ତଣ୍ଡ ।”

୭

୧ ପ୍ରିୟ ଦାଦାଲଡ଼ି ନୁ ଏଲାସ୍, ଇଝୁସାରେ ପ୍ରତିଜ୍ଞା ମାନାଡ଼, ଇଶ୍ୱରତାଗାଙ୍କ ଦରକ୍‌ତେ । ଆଦିଙ୍କ ଝାଡ଼ାଟ୍, ମେନ୍‌ଲୁ ନୁ ଆମ୍ବାଡ଼ିଙ୍କ କାରାପ୍ ମାଡ଼ମାନ୍‌ଲାନ ସାରେ ବିଷୟତାଗାଙ୍କ ନିଜେ ନିଜେଡ଼ିଙ୍କ ଲେକାମ୍ ମାଡ଼ିକାଡ଼ । ମେଣ୍ଡେ ଇଶ୍ୱରତିଙ୍କ ଝେରସ୍ ମିକା ସାରେ ପବିତ୍ରତଡ଼ ମାନ୍ଦିକାଡ଼ ।

ପାଉଲ୍‌ତେ ଝେଡ଼କ୍

୨ ମିଲ ହୁଦୟତାଗ୍ ମାକିଂଙ୍କ ପଡ଼ିୟେ ଇମୁଟ୍ । ମାମ୍‌ମେ ବେନଙ୍କ ଅନ୍‌ୟାୟ୍ ମାଡ଼ମ୍, ବେନଙ୍କ ବାତେଏ ଲସ୍ ମାଡ଼ମ୍ କି ବେନନାଗାଙ୍କ ବାଡ଼ତେ ଫାଇଦା ମାଡ଼ନଙ୍କ ଆଲ୍‌ସି ମାଡ଼ମ୍ ।

୩ ମିକିଂଙ୍କ ଦଷ୍ଟ ଇଦାନଙ୍କ ନାନ୍ ଇଦ୍ ଗର୍ କେଲନ୍ । ନାନ୍ ମୁନେଙ୍କକଞ୍ଜ କେତୁତାନ୍, ମିଡ୍ ମା ଇସର୍ ସାୟେ ଯେ, ମାମ୍ମେ ମାଡ୍ କେ ଅଣ୍ଡାୟାଗେ ମାନ୍ଦିକାଡ୍ ନୁ ଡଲ୍ କେ ଅଣ୍ଡାୟାଗେ ଡଲିକାଡ୍ ।

୪ ମିଇ ପରୁ ନାୟାଦ୍ ଗାଟି ବିଶ୍ୱାସ୍ ମିନ୍ଦେ । ମିଇ ସେଙ୍ଗେ ନାୟାଦ୍ ଗର୍ବ ମିକା ଆଦତେ । ଦୁଃକାମ୍ କଷ୍ଟ ସମୟତେ ନାନ୍ ମୁନେଙ୍କ ତାଦ୍ ଶକ୍ତି ତଅତାନ୍ । ଖେଡ୍ କେତେ ସାରଦେ ଆଡ୍ ତାନ୍ ।

୫ ☆ଇଦ୍ ଲେକାମ୍ କି ମାସିଦୋନିଆତାଗ୍ ଖେଉସ୍ ମିକା ମାମ୍ମେ ରଞ୍ଜମ୍ । ସାରେତାଗେ ଅଶାନ୍ତି ନୁ ଗଲ୍ କ୍ ଆସ୍ ସ ମାଡ୍ ତେ, ଆଦିଙ୍କ ମା ଜିଝୁଣ୍ଡାତାଗେ ଶାନ୍ତି ଇଲ୍ ଖେ ମାଡ୍ ତେ ।

୬ ବାତେଙ୍କ ଇଡ୍ କେ ଚିନ୍ତାତେ ମାୟାନ୍ ନାରୁଡ୍ କ୍ ସାନ୍ନା ଇସମାୟାନ୍ ଇଶ୍ୱର୍ ତିତସ୍ତିଙ୍କ ରସ୍ ମାକିଂଙ୍କ ସାରଦେ ଇଡ୍ ତନ୍ ।

୭ ଅନ୍ଧାଦ୍ ଆଗମନ୍ ଆଡ୍ ତାଙ୍କ ଆୟୁୟ, ମାତର୍ ଅଣ୍ ମିଇ ପାକେ ଆଞ୍ଜ ବେନ୍ ସାରଦେ ପାଏମ୍ ଆଡ୍ ତଣ୍ଡ, ଆଦିନ୍ ସେଙ୍ଗେ ମାମ୍ମେ ଖେଡ୍ କ୍ ଆଡ୍ ତମ୍ । ନାକିଂଙ୍କ ଉଡାନଙ୍କ ମିୟାଦ୍ ବେସର୍ ଇଚ୍ଛା, ନା ସେଙ୍ଗେ ମିୟାଦ୍ ବେସର୍ ଦୁଃକାମ୍, ନାକିଂଙ୍କ ସମର୍ତ୍ତନ୍ ମାଡାନଙ୍କ ମିଡ୍ ବେସର୍ ଇଚ୍ଛା, ଇଦ୍ ସାରେ ବିଷୟ ଅଣ୍ ନାକିଂଙ୍କ କେଡ୍ ତାନ୍ । ଆଦିଙ୍କ ନାନ୍ ଗାଟି ଖେଡ୍ କ୍ ତାନ୍ ।

୮ ନାୟାଦ୍ ଚିଟି କାର୍ସ୍ ମିଡ୍ ଦୁଃକାମ୍ ଆଡ୍ କେ ମିକା, ଆଦ୍ ଚିଟି ଲେକିମାନାଙ୍କ ନା ମନ୍ତାଗ୍ ବାତେଏ ଦୁଃକାମ୍ ଇଲ୍ ଲେ । ଚିଟି ମିକିଂଙ୍କ ସେନେକ୍ତିଙ୍କ ମାଇଦିଙ୍କ ଦୁଃକାମ୍ ଇଡ୍ ତାଙ୍କ ନାନ୍ ଦୁଃକାମ୍ ଆସ୍ ମାନେନ୍ ।

୯ ବାତେଙ୍କ ଇଡ୍ କେ ମିଇ ମନ୍ଦାଗ୍ ଦୁଃକାମ୍ ଇସ୍ ମାନ୍ ଆୟୁୟ, ମାତର୍ ଇଦ୍ ଦୁଃକାମ୍ ମିଇ ଜିଝୁଣ୍ଡାଦ୍ ଗତିପଡ୍ ବାଦ୍ ଲେମ୍ ମାଡ୍ ତାଙ୍କ ଇଞ୍ଜେ ନାନ୍ ଖେଡ୍ କ୍ ପାଏମ୍ ଆଡ୍ ତାନ୍ । ଇଶ୍ୱର୍ ତେ ଇଚ୍ଛା ଲେକାମ୍ ମିଡ୍ ଇଦ୍ ଦୁଃକାମ୍ ସାରେ ମାଡ୍ ତିଡ୍ । ଆଦିଙ୍କ ମା ତଡ୍ ମିଡ୍ ବେଦ୍ ଲେକାମ୍ ମିକା ଲସ୍ ଆୟୁଡ୍ ।

୧୦ ବାତେଙ୍କ ଇଡ୍ କେ ଇଦ୍ ଲେକାଡ୍ ଦୁଃକାମ୍ ଇଶ୍ୱର୍ ତଡ୍ ବ୍ୟବହାର୍ ଆସ୍ ଅଦିନ୍ ତଡ୍ ହୃଦୟ ବାଦ୍ ଲେମ୍ ଆଡ୍ କେ ପରିତ୍ରାଶ

ଦରକିତ୍ । ଇଗେ ଅନୁତାପ୍ ଆଦାନାଦ୍ ବାଡ଼ ଇଲ୍ଲେ । ବାଡେଙ୍କ୍
ଇଡକେ ମାତର୍ ଜଗଡତାଦ୍ ଦୁଃକାମ୍ ଡଲ୍ଲନାଦ୍ ଗଟେମ୍ମାଡିଡ୍ ।

୧୧ ଉଡାବ୍, ଇଶ୍ବରତେ ଲେକାମ୍ ଇଦ୍ ଦୁଃକାମ୍ ମିଲ୍ ମନ୍ତରା
ବେସର୍ ଇଚ୍ଛା, ବେସର୍ ଝେରେ, ବେସର୍ କପାମ୍, ଆମ୍ବଂଶୋଦନ
ସେଙ୍ଗେ ବେସର୍ ଝାଦାନ୍, କାରାପ୍ ପାଡିୟିଦେ ନାରୁଡକ୍ ଦଣ୍ଡ
ଇଦାନଙ୍କ୍ ବେସର୍ ତର୍ପରତା ସଂଚାରିଡ୍ ମାଡ୍ଡେ । ଇଦସାରେ
ବିଷୟତେ ମିଡ୍ ନିର୍ଦ୍ଦୋଷ ଇଞ୍ଜ ପ୍ରାମାନ୍ ଆଦତିଡ୍ ।

୧୨ ଆଦିଙ୍କ୍ ଯଦି ନାନ୍ ମିଲବକେଡ୍ ଚିଟି ଲେକିତାନ୍, ଆଗେକ୍ ବା
ବେନ ଅନ୍ୟାୟ୍ ମାଡ୍ଡେଣ୍ଡ ବା ବେନ ଅନ୍ୟାୟ୍ ସୟେମ୍ ଆଡ୍ଡେନ୍,
ତାନ୍ ଉଦେଶ୍ୟତେ ଆଦ୍ ଆୟ୍ୟ । ଇଶ୍ବରତେ କଣ୍ଡେତେ ମା ସେଙ୍ଗେ
ମିୟାଦ୍ ବକ୍ତି ବେସର୍ ଲେକାମ୍ ନୁ

୧୩ ଆଦିନ୍ ସେଙ୍ଗେ ମାମ୍ମେ ବେସର୍ ସାର୍ଦେ, ଆଦ୍ କେଞ୍ଜପାଙ୍କ୍
ନାନ୍ ଆଦ୍ ଚିଟି ଲେକିତାନ୍ । ମାମ୍ମେ ବେସର୍ ସାର୍ଦେ ଆୟ୍ମ୍ ।
ମିଲଡ୍ ତିତସ୍ତିଙ୍କ୍ ସାରେ ଲେକାମ୍ ସାହାୟ୍ୟ ମାଡି ବେଲାନ୍ ସାର୍ଦେ
ମାଡ୍ଡିଡ୍ । ଆଦ୍ ମାକିଙ୍କ୍ ନାର୍ଗେ ଝେଡକ୍ ଇଡ୍ଡେ ।

୧୪ ତାମ୍ ପାକେ ମିଲ୍ ସେଙ୍ଗେ ନାନ୍ କେସ୍ମିନ୍ଦେନ୍ । ମେଣ୍ଡେ ଆଦିନ୍
ସେଙ୍ଗେ ନା ତାଲେ ମଦଲ୍ ଆୟ୍ୟ । ବେଲାନ୍ ମିଲ୍ ପାକେ ମାମ୍ମେ
ସାରେଦିନା ସଡ୍ କେସ୍ ଝାଦୁତମ୍, ଆଦେଲେକାମ୍ ତିତସ୍ତିତେ ପାକେ
ମାମ୍ମେ ମାଡିମାନ୍ଦାନ୍ ଗବ୍, ବୁସା ଇଞ୍ଜ ପ୍ରାମାନ୍ ଆୟ୍ୟ ।

୧୫ ମିଡ୍ ସାରେଡଡ୍ ବେଲାନ୍ ଅନ୍ୟାଦ୍ ଗଟ୍ତାର୍ ମାଡ୍ଡିଡ୍ ମେଣ୍ଡେ
ଝେରେ ନୁ ଜିଞ୍ଜୁନ୍ ଝାଡକି ଅଂକିଙ୍କ୍ ସ୍ବାଗଡ୍ ମାଡିମାଡ୍ଡିଡ୍, ଇଦ୍ ଗଟ୍
ଏକା ମାଡି ମିଲ୍ ସେଙ୍ଗେ ଅନାଦ୍ ପ୍ରେମ୍ ମେଣ୍ଡେ ଅଦିକ୍ ନାର୍ଗେ
ଆସ୍ମିନ୍ଦେ ।

୧୬ ନାନ୍ ସାରେ ବିଷୟତେ ମିଲ୍ ପରୁ ସାରେ ବିଶ୍ବାସ୍ ମାଡ୍ଡିଡ୍ ନାନ୍
ବେସର୍ ସୁକାମ୍ତେ ।

୮

କ୍ରିଷ୍ଟିୟାନ୍ ଦାନାମ୍

୧ ☆ଦାଦାନତି ନୁ ଏଲାୟ୍, ମାସିଦୋନିଆତେ ମଣ୍ଡଲିକିନାଗ୍
ବେଲାନ୍ ଇଶ୍ବରତେ ଅନୁଗ୍ରହ ଲାବ୍ ମାଡ଼ତଡ଼, ଆଦ୍ ମିକିଂଙ୍କ
କେତାନଙ୍କ ଇଚ୍ଛା ମାଡ଼ତୁନ୍ ।

୨ ଅଡ଼ ଗାଟି ତିପାଲ୍ ଇସ୍ ପରିକ୍ଷିତ୍ ଆଦତଡ଼, ନୁ ଅଡ଼ ଗାଟି ଗରିବ୍
ଆଡ଼କେ ମିକା, ନାର୍ଗେ ଦାନ୍ ଇସ୍ ନିଜେର୍ ମାନ୍ତାଦ୍ ଝାସମିନ୍ଦେନ୍
ଝେଡ଼କ୍ କେସ୍ ମିନ୍ଦେ ।

୩ ନାନ୍ ନିଜାମ୍ତେ କେତୁତାନ୍ ଯେ, ଅଡ଼ ନିଜେଡ଼ ଇଚ୍ଛାତେ ବେସର୍
ପାର୍ତ ଆସର୍ ଇଡ଼ତଡ଼, ନୁ ମେଣ୍ଡେ ଅଦିକ୍ ମିକା ଦାନ ମାଡ଼ିମିନ୍ଦେଡ଼,
।

୪ ଯିହୁଦାତାଗ୍ ମାନ୍ଦାନ୍ ଇଶ୍ବରତେ ନାରୁଡ଼କିଙ୍କ୍ ସାହାଯ୍ୟ ମାଡ଼ାନ୍
ସେଙ୍ଗେ ଅଡ଼କିଂଙ୍କ୍ ସୁଯୋଗ୍ ଇଞ୍ଜିଡ଼, ଇଞ୍ଜି ଅଡ଼ ମାକିଂଙ୍କ୍ ଅନୁରୋଦ୍
ମାଡ଼ି କେସ୍ମାଡ଼ତଡ଼ ।

୫ ଅଡ଼ଆଗାଙ୍କ୍ ମାମ୍ମେ ଇସର୍ ଆଗେ ମାଡ଼ି ମାନମ୍ । ମୁନେ
ଅଡ଼ ନିଜେ ନିଜେତିଙ୍କ୍ ପ୍ରବୁନ୍ ପାକେ ଉସର୍ଗ୍ ମାଡ଼ତଡ଼, ନୁ ପେରକେ
ଇଶ୍ବରତେ ଇଚ୍ଛା ଲେକାମ୍ତେ ନିଜେ ନିଜେତିଙ୍କ୍ ମାନ୍ ଉଦେଶ୍ୟତେ
ଉସର୍ଗ୍ ମାଡ଼ତଡ଼ ।

୬ ତିତସ୍ତଡ଼ ଇଦ୍ ପାଡ଼ିୟି ଆରାମ୍ ଆସ୍ମାତେ । ଇଦିଙ୍କ୍ ଚାଲାମାଡ଼ି
ନେହେତାନ୍ ସେଙ୍ଗେ ନୁ ଇଦ୍ ପ୍ରେମାତାଦ୍ ସେବା ପାଡ଼ିୟିଦାଗ୍ ମିକିଂଙ୍କ୍
ସାହାଯ୍ୟ ମାଡ଼ାନ୍ ସେଙ୍ଗେ ତିତସ୍ତଡ଼ ଅନୁରଦ୍ ମାଡ଼ତମ୍ ।

୭ ମିଡ଼୍ ମିୟାଗ୍ ବାଡ଼ ସାର୍ରେ ମିନ୍ଦେ ଆଗେ ସାଉକାର୍ ଆଦତିଡ଼,
ବିଶ୍ବାସ୍, ସାୟେ ଗଟି କେତାନଡ଼, ବୁଦ୍ତେ, ସାହାଯ୍ୟ ମାଡ଼ାନଙ୍କ୍ ତିଆର୍
ନୁ ମା ସେଙ୍ଗେ ପ୍ରେମ ତଅତାନଙ୍କ୍ ନାର୍ଗେ ପରିଚୟ ଇମୁର୍, ଇଦ୍
ନାୟାଦ୍ ଇଚ୍ଛା ।

୮ ଇଦ୍ ବିଷୟତେ ମିଇ ସେଙ୍ଗେ ନାନ୍ ବାତେବା ମିଡ଼୍ ତିଆର୍ ମାଡ଼ନ୍
। ମାତର୍ ସେବାକାମ୍ଦାଗ୍ ବାଗାତଡ଼ ଇଚ୍ଛାତେ ଝେଷଡ଼ଇସ୍ ମିଇ
ପ୍ରେମତେ ପାଡ଼ିୟି ପୁନ୍ଦାନଙ୍କ୍ ନାନ୍ ଆଲ୍ଲାସି ମାଡ଼ତୁନ୍ ।

୯ ମାଡ଼୍ ପ୍ରବୁ ଜିସୁ କ୍ରିଷ୍ଟନ୍ ଅନୁଗ୍ରହ ବିଷୟ ପୁନୁର୍ । ଅଣ୍ଡ୍ ସାଉକାର୍
ଆସ୍ମିକା ମିଇ ସେଙ୍ଗେ ଗରିବ୍ ଆଡ଼ତଣ୍ଡ୍, ଅନ୍ ଗରିବ୍ ତଡ଼୍ ମିଡ଼୍ ଗାଲା
ବେଲା ସାଉକାର୍ ଆଦ୍ ପାର୍ଦ୍ଦତିନ୍ ।

୧୦ ଇଦ୍ ବିଷୟରେ ମିକିଂଙ୍କ ନାୟଦ୍ ଇଦ୍ ଗର୍ ଆଡ଼ରେ ଶ୍ରେଷ୍ଠତ୍, ମିଡ୍ ବାତେଏ ଆରାମ୍ ମାଡ଼ି ମାଡ଼ିତ୍, ଆଦ୍ ଇଞ୍ଜେ ତେରସ୍ତାନାଦ୍ ମିୟାଦ୍ ସାୟେ । ମାତର୍ ପାଡ଼ିୟି ମାଡ଼ାନନ୍ ଆୟ୍ୟ, ମାତର୍ ପାଡ଼ିୟି ମାଡ଼ାନଙ୍କ ଯୋଜନା ମାଡ଼ାନାଗ୍ କେତାନାଦ୍ ମିଡ୍ ଆଦ୍ତିଡ୍, ମୁନ୍ନେତଡ଼ି ।

୧୧ ଆଦିଙ୍କ ପାଡ଼ିୟି ମାଡ଼ ମାନୁର୍ ନୁ ମିଇ ସୁପଗ୍ତେ ଉଡ଼ି ଆଦ୍ ତେସ୍ତାଟ୍ । ଯୋଜନା ମାଡ଼ାନ ଶ୍ରେଲେ ମିୟାଦ୍ ବେନ୍ ଲେକାମ୍ ଇଞ୍ଜା ମାଡ଼ତେ, ପାଡ଼ିୟି ତେରନା ଯାକ ଆଦିଙ୍କ ଲେକେଡ୍ ଆଦ୍ପି ଖାଟାଟ୍ ।

୧୨ ବାତେଙ୍କ ଇଡ଼କେ ଦାନ ମାଡ଼ାନାଦ୍ ଇଞ୍ଜା ମାଡ଼ତେ, ନାରୁନ୍ ତାନ୍ ପାର୍ତେ ଆସର୍ ବାଡ଼ ଦାନ ମାଡ଼ିତନ୍, ଇଶ୍ବର ଗ୍ରହନ୍ ମାଡ଼ିତନ୍ । ତାନ୍ ସମ୍ପତିଡ଼ତେ ତାନ୍ ବାଇଦେ ଅଣ୍ଟ ବାତେଏ ଇଞ୍ଜି ଇଞ୍ଜ ଇଶ୍ବର ଇଞ୍ଜା ମାଡ଼ଣ୍ ।

୧୩ ମିଇ ପରୁ ଇଦ୍ ବଜଡିଙ୍ଗ୍ ଲଦାମାଡ଼ି ବାଗାତଡ଼କ୍ ଶ୍ରେଡ଼କ୍ ଇଦାନ୍ ସେଙ୍ଗେ ନାନ୍ନେ ଆଲ୍ସି ମାଡ଼ନ୍,

୧୪ ବାତେଙ୍କ ଇଡ଼କେ ଇଞ୍ଜେ ମିୟାଦ୍ ନାରଗେ ମାନ୍ନାଙ୍କ ଅବାବ୍ତେ ମାନ୍ନାନ୍ ନାରୁଡ଼କ୍ ସାହାୟ୍ୟ ମାଡ଼ାନାଦ୍ ମାୟାଦ୍ ପାଡ଼ିୟି । ଦିନାମ୍ ଖାଡ଼ତେ, ମିଡ୍ ଅବାବ୍ତେ ମାନ୍ନାନ୍ ଶ୍ରେଲେ, ଅଡାଦ୍ ସମ୍ପତି ମିୟାଦ୍ ଅବାବ୍ ପୁରନ୍ମାଡ଼ାନ ସେଙ୍ଗେ ସାହାୟ୍ୟ ମାଡ଼ିତଡ଼ । ଇଦ୍ଲେକାମ୍ ମିଡ୍ ଆନ୍ତେ ସାମାନ୍ ଲେକେମ୍ ଗେଲ୍ସାନଙ୍କ ପାର୍ଦ୍ତିଡ଼ ।

୧୫ ଦର୍ମଶାସ୍ତ୍ରତାଗ୍ ଲେକାମିୟେ, “ବେନ ନାରଗେ ଗୁଡ଼ପିତଣ୍, ଅନାଦ୍ ବାତେଏ ମାୟ୍ୟ । ବେନ ସୁକୁକ୍ ଗୁଡ଼ପିତଣ୍, ଅନାଦ୍ ମେଣ୍ଟେ ଅବାବ୍ ଆୟ୍ୟ ।”

ତୀତସ୍ ନୁ ତାନ୍ ସାଙ୍ଗନଡ଼

୧୬ ଇଶ୍ବରତେ ଦନ୍ୟବାଦ୍ ଆୟ୍ । ବାତେଙ୍କ ଇଡ଼କେ ମାନ୍ଲେକାମ୍ ତିତସ୍ ମିକା ମିକିଂଙ୍କ ସାହାୟ୍ୟ ମାଡ଼ାନ ସେଙ୍ଗେ ତିଆର୍ ମିଡ଼େନ୍ ।

୧୭ ଅଣ୍ଟ ମାତର୍ ମାନ୍ ଅନୁରଦ୍ତିଙ୍କ ସ୍ବାଗଡ଼ ମାଡ଼ଡ଼, ମାତର୍ ମିକିଂଙ୍କ ସାହାୟ୍ୟ ମାଡ଼ାନଙ୍କ ଇସର୍ ତିଆର୍ତେ ମିନ୍ଦେନ୍ ଯେ, ନିଜେଡ଼ ଇଞ୍ଜାତେ ମାଇପାକେ ଆଦାନ୍ ସେଙ୍ଗେ ଅନ୍ ମାନ୍ ମାଡ଼ିମିୟେଣ୍ ।

୧୮ ଅନ୍ ତଡ଼ ମେଣ୍ଟେଅରଡୁନ୍ ଦାଦାଙ୍କ ରଡୁତମ୍ । ସୁସମାଚାର୍ ଗର୍ ପ୍ରଚାର୍ ମାଡ଼ାନଙ୍କ ସାରେ ମଣ୍ଡଲିନାଗ୍ ଅଣ୍ଟ ବିଶେଷ୍ କ୍ୟାତିଲାବ୍ ମାଡ଼ଡ଼ଣ୍ ।

୧୯ ମାତର ଆସର ଆୟୁୟ, ପ୍ରବୁନ୍ ଗୌରବ୍ ନୁ ମାନାଦ୍ ନମସ୍କାର କେତ୍ତାନ ସେଙ୍ଗେ ବେନ୍ ସେବା ପାଡ଼ୁୟି ମାନାଡ଼ ପାଏମ୍ ଆଡ଼ତାଡ଼, ଆଗେ ମାନାଦ୍ ସାରେତାଗ୍ତଡ଼ ଆଦାନ୍ ସେଙ୍ଗେ ବେନାବେନା ମଣ୍ଡୁଲି ଅଂକିଙ୍କ୍ ଏଞ୍ଚି ମିନ୍ତେ ।

୨୦ ଉଦାରତେ ଇସ୍ମାୟାନ୍ ଇଦ୍ ଦାନତିଙ୍କ୍ ଗାଟି ସାବ୍ଦାନତେ ମାମ୍ମେ ସେବା କାମ୍ତାଗ୍ ବ୍ୟବହାର୍ ମାଡ଼ୁମ୍, ନେଲାନ୍ ମା ପରୁ ବେନ ଦୋଷ୍ମାଡ଼େ ପାରୁଙ୍ଗନ୍ ।

୨୧ ବାତେଙ୍କ୍ ଇଡ଼କେ ମାତର ପ୍ରବୁନ୍ ସାକ୍ଷାତ୍ତେ ଆୟୁୟ, ମାତର ନାରୁନ୍ ସାକ୍ଷାତ୍ ମିକା ସଡ଼ ମାୟାନ୍ ମାନାଦ୍ ଲକ୍ଷ ।

୨୨ ଆଦିଙ୍କ୍ ଅଡ଼ତଡ଼ ଇଣ୍ଡ ଦାଦାଙ୍କ୍ ମାମ୍ମେ ରଡ଼ତମ୍ । ଅଂକିଙ୍କ୍ ନାଗେଦାମ୍ ପରିକ୍ଷା ମାଡ଼ି ଅନ୍ ବିଶ୍ୱାସ୍ତେ ପରିଚୟ ଦରସ୍ତତମ୍ । ମିଇ ପରୁ ଅନାଦ୍ ଗାଟି ଆଗେ ମାନ୍ନାଙ୍କ୍ ଅଣ୍ଡ ମିକିଂଙ୍କ୍ ସାହାୟ୍ୟ ମାଡ଼ାଙ୍କ୍ ସେଙ୍ଗେ ଅଦିକ୍ ଆଗ୍ରହ ଆଡ଼ତନ୍ ।

୨୩ ତିତସ୍ତେ ପରିଚୟ ଇଦ୍, ଅଣ୍ଡ ନା ତଡ଼ଦେ ନଣ୍ଡ ନୁ ମିକିଂଙ୍କ୍ ସାହାୟ୍ୟ ମାଡ଼ନାଙ୍କ୍ ନା ତଡ଼ ପାଡ଼ୁୟି ମାଡ଼ାନଣ୍ଡ । ମେଣ୍ଡେ ଅନ୍ତଡ଼ ଆଞ୍ଜମାନ୍ତାନ୍ ବାଗାତଡ଼ ପ୍ରେରିତ ବିଶ୍ୱାସୀ ଦାଦାନଡ଼ ପରିଚୟ, ଅଡ଼ ମଣ୍ଡୁଲି ସାରେତାଞ୍ଜିନ୍ ପ୍ରତିନିଦି ନୁ କ୍ରିଷ୍ଟନ୍ ଗୌରବ୍ ଲେକାମ୍ ।

୨୪ ଅଡ଼କିଂଙ୍କ୍ ମିୟାଦ୍ ପ୍ରେମ ତମୁଟ୍ । ଆଲାଆଡ଼କେ ସାରେ ମଣ୍ଡୁଲି ଇଦ୍ ବିଷୟତେ ନିଜାମ୍ ଆଦତେ ନୁ ମିଇ ସେଙ୍ଗେ ମାମ୍ମେ ମାଡ଼ମାୟାନ୍ ଗର୍ବ ସଡ଼ ଇଞ୍ଜ ବୁଜେମ୍ ଆଦପାର୍ଦତଡ଼ ।



ବାଗାଡ଼ ମଣ୍ଡୁଲିତେ କ୍ରିଷ୍ଟିୟାନ୍ ସେଙ୍ଗେ ସାହାୟ୍ୟ

୧ ଯିହୁଦାତାଗ୍ ମାୟାନ୍ ଇଶ୍ୱରତେ ନାରୁଡ଼ତେ ପାକେ ସାହାୟ୍ୟ ରତାନ୍ ସେଙ୍ଗେ ମିକିଂଙ୍କ୍ ଲେକାନାଲ୍ଦ ବାତେଏ ଆବଶ୍ୟକତା ଲେଲେ ।

୨ ନାନ୍ ପୁଡ଼ତାନ୍, ମୀଇଡ଼ ସାରେଦାମ୍ ସାହାୟ୍ୟ ମାଡ଼ାନଙ୍କ୍ ତିଆର୍ ନୁ ମାସିଦୋନିଆତେ ନାରିଡ଼ ପାକେ ମିୟାଦ୍ ବିଷୟତେ ନାନ୍ ଗର୍ବ ମାଡ଼ତାନ୍ । ନାନ୍ କେସ୍ମାଡ଼ତାନ୍, “ଆକାୟାତେ ଦାଦାନତି ସାହାୟ୍ୟ ମାଡ଼ାନ୍ ସେଙ୍ଗେ ଆଡ଼ତେ ଝାଡ଼୍ଷା କନ୍ସ୍ ତିଆର୍ ଆସ୍ ମିନ୍ଦେ

୧୩” ମିୟାଦ ଆଗ୍ରହ ଅଡ଼, ତାଗାଙ୍କ ନାରଗେ ନାରିଡ଼କିଙ୍କ ତିଆରତେ ମାଡ଼ତେ ।

୩୩ ଇଞ୍ଜେ ନାନ ଇ ଦାଦାନଡ଼କ୍ ମିଇ ପାକେ ରହସମିନ୍ଦେନ୍ । ଉଡ଼େ, ଇଦ୍ ସମୟତେ ବେଲାନ ମିୟାଦ ବିଷୟତେ ମାୟାଦ ଗର୍ବ ଆଙ୍ଗଡ଼ାମ୍ ଆୟମାକି । ନାନେନ କେଡ଼ତାନ ଲେକାମ୍ ମିଡ଼, ଦାନତଡ଼, ତିଆର୍ ଆସ୍ ମାନୁର୍ ।

୪୪ ମାସିଦୋନିଆତେ ନାରୁଡ଼, ନା ତଡ଼ ଆଞ୍ଜ୍ ଯଦି ମିକିଂଙ୍କ ତିଆର୍ ଆଡ଼ତାଦ୍ ଉଡ଼ିତଡ଼; ଆଲେକେ ମିଇ ପରୁ ଗାଟି ଆଗେ ମାନ ମାମ୍ମେ ସିଗ୍ ଆଦତମ୍, ନିଜାମ୍ କେତାନଙ୍କ ଆଡ଼କେ, ଆଦ୍ ମିଇ ପାକେ ମିକା ସିଗ୍ତାଦ୍ ଆଦତେ ।

୫୫ ମିଡ଼, ପ୍ରତିଶ୍ରୁତି ଇସ୍ ମାୟାନ ଦାନ ନେହେତାନ ସେଙ୍ଗେ ଇ ଦାଦାନଡ଼କ୍ ନାନ ଆଦାନ ମୁନେଙ୍କ ମିଇ ପାକେ ରଥତାନ ସେଙ୍ଗେ ମାନ ମାଡ଼ତାନ । ଆଲେକେ, ନାନ ମିଇ ପାକେ ହେସ୍ତୁଦାନ ଖେଲେ ଇଦ୍ ଦାନ ଗୁଡ଼ି ନେହେସ୍ ମାୟାନ ମିନ୍ଦେ । ଇଦିନତଡ଼, ମିଡ଼, ବାଦ୍ୟତଡ଼, ଇଞ୍ଜେକଟ ନିଜେଡ଼ ଇଚ୍ଛାତେ ଇଦୁଡ଼ିଡ଼, ଇଞ୍ଜେ ପ୍ରକାଶ୍ ଆଦତେ ।

୬୬ ହେର୍କା ନେହେମୁର୍, ବେନ ସୁକୁକ୍ ଝିନ୍ ଝିତିତନ୍, ଅଣ୍ଡ୍ ସୁକୁକ୍ ପାଣ୍ଡ୍ସିତନ୍; ବେନ ନାରଗେ ଝିନ୍ ଝିତିତନ୍, ଅଣ୍ଡ୍ ନାରଗେ ପାଣ୍ଡ୍ସିତନ୍ ।

୭୭ ବେନ ବେଲା ନିଜେଡ଼ ଜିଝୁଣ୍ଡତାଗ୍ ଆଲ୍‌ସିତିଡ଼, ଅଣ୍ଡ୍ ଆଲାନ ଦାନ ମାଡ଼ିଣ୍ଡ ନୁ ଆଦ୍ ଦାନ ଦୁଃକାମ୍ ଆସ୍ ବା ମାଡ଼ର ଉରଗାଡ଼, ଆୟମାକି । ବାତେଙ୍କ ଇଡ଼କେ ଖେଡ଼କେତେ ଇଦାନଙ୍କ ଇଶ୍ବର୍ ପ୍ରେମ ମାଡ଼ିତନ୍ ।

୮୮ ସାରେଲେକାଡ଼ ଦାନତେ ମିକିଂଙ୍କ ଉନ୍ନତି ମାଡ଼ାନ ସେଙ୍ଗେ ଇଶ୍ବର୍ ପାର୍‌ଦତଣ୍ଡ; ପେରକେ ମିଡ଼, ସାରେଦାମ୍ ସମ୍ପତିତାଗେ ବାଦକେ ପାର୍‌ଡିଡ଼, ନୁ ସାରେ ଲେକାଡ଼ ଲେକେଡ଼ ପାଡ଼ିୟି ସେଙ୍ଗେ ବେସର୍ ଦରକାର୍ ଆସର୍ ଦାନ ଇଦ୍‌ଏ ପାର୍‌ଡିଡ଼ ।

୯୯ ଦର୍ମଶାସ୍ତ୍ରତାଗ୍ ଲେକାମିନ୍ଦେ, “ଅବାଦତେ ନାରିଡ଼କ୍ ଅଣ୍ଡ୍ ଉଦାରତଡ଼ ଦାନ ମାଡ଼ିତନ୍; ତାନ କୃପା ସାରେଦିନାଡ଼ ମାଇଦିଙ୍କ ।”

୧୦୦ ବେନଡ଼, ବାଦକାନଡ଼କ୍ ଇଶ୍ବର୍ ଝିତାନ ସେଙ୍ଗେ ଝିନ୍ ନୁ ତିନ୍ଦାନ ସେଙ୍ଗେ କାଦି କେପ୍‌ସିତନ୍, ଅଣ୍ଡ୍ ମିୟାଦ କାମ୍‌ମାଡ଼ାନ ଲେକାମ୍‌ତେ

ଝିଜ୍ ନେହେରିଦତନ୍ ନୁ ମିଇୟାଦ୍ ଉଦାର୍ତେ କାୟେ ଲେକାମ୍ ମିଡ୍, ଆନ୍ତେ ନାର୍ଗେ ଫସଲ୍ ପାଣ୍ଡୁସ୍ତିଡ୍ ।

୧୧ ମିଇଡ୍, ସାରେଦାମ୍ ବେଲାନ୍ ଉଦାର୍ ଲେକାମ୍ ଦାନ ମାଡେ ପାର୍ତିଡ୍, ଇଦିନ୍ ସେଙ୍ଗେ ଇଶ୍ବର ମିକିଂଙ୍କ୍ ସାରେ ବିଷୟତେ ଉନ୍ନତି ମାଡିତନ୍ ନୁ ମାନ୍ ତଡ୍, ମିଡ୍ ରଅସ୍‌ମାୟାନ୍ ଦାନ ସେଙ୍ଗେ ନାର୍ଗେ ଇଶ୍ବରତିଙ୍କ୍ ଝେଡ୍‌କେତେ ଦନ୍ୟବାଦ୍ ଇଦ୍‌ତଡ୍ ।

୧୨ ମିୟାଦ୍ ଦାନ ଲେକ୍‌ତାଦ୍ ସେବା ପାଡ୍‌ୟିତଡ୍, ମାତର୍ ବେନ ଇଶ୍ବରତେ ନାରୁଡ୍‌ତେ ଅବାବ୍ ଯେକା ଆଦ୍‌ତେ, ଆଦ୍ ଆୟ୍‌ୟ୍, ବାତେଙ୍କ୍ ଇଡ୍‌କେ ଇଦିନ୍ ତଡ୍, ଇଶ୍ବରତେ ସେଙ୍ଗେ ନାର୍ଗେ ନାରୁଡ୍, ହୃଦୟତାଗ୍ କୃତଜ୍ଞତା ମିଡ୍ ଆଦ୍‌ତେ ।

୧୩ ଇଦ୍ ସେବା ପାଡ୍‌ୟି ତଡ୍, କ୍ରିଷ୍ଟନ୍ ସୁସମାଚାରତେ ସେଙ୍ଗେ ମିୟାଦ୍ ବିଶ୍ବାସ୍ତେ ସେଙ୍ଗେ ନୁ ସାରେତଡ୍, ତଡ୍, କାଇଲି ମିକା ମିଡ୍, ବେନ୍ ପ୍ରସଂଶା ମାଡ୍‌ତିଡ୍, ଆଦିନ୍ ସେଙ୍ଗେ ଅଡ୍, ଇଶ୍ବରତିଙ୍କ୍ ଗୌରବ୍ ମାଡିତଡ୍ ।

୧୪ ମିଇ ମାୟ୍‌ଦିଙ୍କ୍ ଇଶ୍ବରତେ ନାର୍ଗେ ଅନୁଗ୍ରହ ସେଙ୍ଗେ ଅଡ୍, ବିଶ୍ବାସ୍‌ତାଗ୍ ନାର୍ଗେ ପ୍ରେମତଡ୍, ପ୍ରାର୍ଥନାତାଗ୍ ମିକିଂଙ୍କ୍ ହେର୍କା ମାଡିତଡ୍ ।

୧୫ ଝାଡ୍‌ବର୍, ଇଶ୍ବରତେ ବାକ୍‌ଝା ନୁ ମୁଲ୍ୟହିନ ଦାନ ସେଙ୍ଗେ ଅନ୍ ସେଙ୍ଗେ କୃତଜ୍ଞତା ମାଡିକାଡ୍ !

୧୦

ଅପପ୍ରଚାର୍ ବିରୁଦ୍ଧତେ ପାଉଲ୍‌ତେ ଉତ୍ତର୍

୧ ନାନ୍ ପାଉଲ୍, ମିକିଂଙ୍କ୍ ନାୟାଦ୍ ଇଦ୍ ବ୍ୟାକ୍ତିଗତ ଦନ୍ୟବାଦ୍ ବେନ କେଡିତଡ୍, “ନାନ୍ ମିଇ ପାକେ ମାୟାନ୍ ଝେଲେ ଗାଟି ନମ୍ବ୍ର ନୁ ଶାନ୍ତି, ବାତେଙ୍କ୍ ଇଡ୍‌କେ ଯେକା ଆଡ୍‌କେ ଅଦିକ୍ ସାହାସୀ ।” କ୍ରିଷ୍ଟନ୍ ନମ୍ବ୍ରତା ନୁ କମଲ ନାନ୍ ମିକିଂଙ୍କ୍ ଦନ୍ୟବାଦ୍ ମାଡି କେତୁତାନ୍,

୨ ମିଇ ତଡ୍, କାଇଲ୍‌ତେ ଝେଲେ ନାକିଂଙ୍କ୍ ବେଲାନ୍ କାରାପ୍ ବ୍ୟବହାର୍ ମାଡାନଙ୍କ୍ ଆୟ୍‌ୟ୍ । ବାତେଙ୍କ୍ ଇଡ୍‌କେ ବେନଡ୍, ହେର୍କା ମାଡିତଡ୍, ଯେ, ମାମ୍‌ମେ ଜାଗତିକ ରୀତିନୀତି ଲେକାମ୍ ମାନ୍‌ଡମ୍,

ଅଡ଼ ବିରୁଦ୍ଧତେ ଦୃଢ଼ ପଦକ୍ଷେପ ଆଦାନାଦ୍ ନାରଗେ ସାହାସ ନାୟାଦ୍ ମିନ୍ଦେ ।

୩ ମାମ୍ମେ ଇଦ୍ ଜଗତ୍ତାର୍ ବାଦକୁତମ୍ ଇଦ୍ ସତ୍, ବାତେଙ୍କ୍ ଇଡ଼କେ ବାତେବା ଜାଗତିକ୍ ଲେକାମ୍ ନେହେସ୍ ଯୁଦ୍ ମାଡ଼ମ୍,

୪ ମାତର୍ ଇଶ୍ବରତେ ଶକ୍ତିତାସ୍ ସୁରାଟେଙ୍ଗା ବ୍ୟବହାର୍ ମାଡ଼ି ଶତ୍ରୁତାସ୍ ଦୃଢ଼ ଦୁର୍ଗସାରେ ଦ୍ଵଂସ ମାଡ଼ିତମ୍, ବ୍ରାହ୍ମ ଯୁକ୍ତିସାରେ କଣ୍ଡନ୍ ମାଡ଼ିତମ୍ ।

୫ ଇଶ୍ବରତେ ଜ୍ଞାନତିଙ୍କ୍ ବିରୁଦ୍ ମାଡ଼ମାୟାନ୍ ସାରେତଡ଼୍ ଆଡାମ୍ ଆଦାନଡ଼କ୍ ମାମ୍ମେ ଉଝୁତିତମ୍ ନୁ ନାରୁଡ଼ତେ ସାରେ ଚିନ୍ତେ ଆୟଡ଼ ମାଡ଼ି କ୍ରିଷ୍ଣନ୍ କାହିଲି ମାଡ଼ିକାଡ଼୍ ।

୬ ମିଡ଼୍ ପୁରାପୁରି ଲେକାମ୍ କ୍ରିଷ୍ଣନ୍ ଅନୁଗତ ସ୍ବିକାର୍ ମାଡ଼ାନ୍ ପେରକେ ମିଇ ଲୋପେ ମେଣ୍ଡେ ବାତେବା ଅବାଦ୍ୟତା ତଅନ୍ଦକେ, ତାନାଦ୍ ପ୍ରତିକାର୍ ମାଡ଼ାନଙ୍କ୍ ମାମ୍ମେ ତିଆର୍ ।

୭ ମିଇ ସାରେପାକେ ବାତେଏ ସାରେ ଗଟେମ୍ ଆଦୁଡ଼ତେ, ଉଡ଼ାଟ୍ । ମିଇୟାଗେ ବେନ କ୍ରିଷ୍ଣନ୍ ପେରକେ ଆଦାନଶ୍ଚ୍ ମିନ୍ଦେଶ୍ଚ୍ କି ? ଯଦି ମିନ୍ଦେନ୍, ଆଲେକେ ଅଶ୍ଚ୍ ମେଣ୍ଡନ୍ୟାମ୍ ଇଦ୍ ଚିନ୍ତେ ମାଡ଼ିତୁଣ୍ଡ୍ । ବାତେଙ୍କ୍ ଇଡ଼କେ ଅନ୍ ଲେକାମ୍ ମାମ୍ମେ ମିକା କ୍ରିଷ୍ଣନ୍ ପେରକେ ଆଦାନମ୍ ।

୮ ମିଇକିଙ୍କ୍ ଦ୍ଵଂସ ମାଡ଼ାନଙ୍କ୍ ଆୟୟ, ମାତର୍ ଗଠନ୍ ମାଡ଼ାନ୍ ସେଙ୍ଗେ ଇଶ୍ବର ମାନ୍ ବେନ୍ ଅଦିକାର୍ ଇଡ଼ତନ୍, ଆଦିନ୍ ସେଙ୍ଗେ ଯଦି ନାନ୍ ନାରଗେ ଦର୍ପ ମାଡ଼ିମାନ୍ତାନ୍, ଆଲେକେ ସିଗ୍ ଆୟନ୍ ।

୯ ନାୟାଦ୍ ଚିଟି ତଡ଼୍ ମିକିଙ୍କ୍ ଝେରସ୍ଥାନଙ୍କ୍ ଆଲ୍ସି ମାଡ଼ାନାଦ୍ ନାୟାଦ୍ ଇଚ୍ଛା ଆୟୟ ।

୧୦ ବେନ କେତିତଡ଼୍, “ପାଉଲ୍ତେ ଚିଟି କି ଗାଟି ବାଦେମ୍ ଆଡ଼ତେ ଲେକାମ୍ ବା ଝାୟ୍ରେ ମାୟାନ୍ ଲେକାମ୍ ବାତେଙ୍କ୍ ଇଡ଼କେ ମା ତଡ଼୍, ମାୟାନ୍ ଝେଲେ ଅଶ୍ଚ୍ ଦୁର୍ବଲ୍ ଲେକାମ୍ ତୟାନଶ୍ଚ୍ ନୁ ଅନ୍ ଗଟି ମୁଲ୍ୟ ଆୟ୍ଝେ ଲେକାମ୍ ହେର୍କା ଆୟ୍ନୁ ।”

୧୧ ଆଦ୍ ନାରୁଡ଼୍ ବୁଜେମ୍ ଆଦାନାଦ୍ ଲେକାମ୍ ଯେ, ମାମ୍ମେ ଯେକାଙ୍କ୍ ଚିଟିତେ ବାଡ଼ ଲେକିତମ୍, ସାକ୍ଷାତେ ଆଦିଙ୍କ୍ ପାଡ଼ିୟିଦାଗ୍ ସାୟେ ମାଡ଼ିତମ୍ ।

୧୨ ନିଜାମ୍ ନିଜେତିଙ୍କ୍ ଇଦ୍ଲେକାମ୍ ବେଡ଼ି ହେର୍କା ମାଡ଼ମାୟାନ୍

ନାରୁଡ଼ତଡ଼, କାୟଲାନ ସେଙ୍ଗେ ବା ଅଡ଼ତଡ଼ ନିଜେତିଙ୍କ ସାମାନ ମାଡ଼ାନାଦ୍ ସାହାସ୍ ମାୟାଦ୍ ଇଲ୍ଲଲେ । ଅଡ଼, ବେସର୍ ବକୁଞ୍ଜାଲଡ଼, ବାତେଙ୍କ ଇଡ଼କେ ଅଡ଼, ନିଜେତିଙ୍କ ନିଜେ କଲ୍ଲସିତଡ଼, ନିଜେଡ଼ ମାନଦଣ୍ଡତେ ନିଜେ ନିଜେଡ଼ ବିଚାର ମାଡ଼ିତଡ଼ ।

୧୩ ବାତେଙ୍କ ଇଡ଼କେ ମାୟାଦ୍ ଦର୍ପ ସୀମିତ । ଇଶ୍ବର ମା ସେଙ୍ଗେ ବେନ କାମ୍‌ଞ୍ଜାୟେ ତିଆର୍ ମାଡ଼ତଣ୍ଡ, ତାନ୍ ଲୋପେନେ ମାମ୍‌ମେ ଦର୍ପ ମାଡ଼ିତାଡ଼ । ଆଦ୍ ପାଡ଼ୟି ଝାୟେତାଗ୍ ଝେଲ୍ଲୁମ୍ ଲେକାମ୍ ମୀଇଡ଼, ମାନତିଡ଼ ।

୧୪ ଆଦିନ୍ ସେଙ୍ଗେ ମାମ୍‌ମେ ମୁନେ କ୍ରିଷ୍ଟନ୍ ସୁସମାଚାର୍ ମିଇ ପାକେ ଆସ୍‌ମାନ୍‌ସନ୍ ସମୟତେ ବାତେବା ସୀମା ବାୟ୍‌ଦେଡ଼ ପାଡ଼ୟି ମାଡ଼ମ୍ ।

୧୫ ଇଶ୍ବର ମାଡ଼ିମାନ୍‌ସନ୍ ମା କାମ୍‌ଞ୍ଜାୟେତେ ପରିସର ବାଇଦେ ବାଗାତଡ଼ ପାଡ଼ିୟିଦେ ସୁଯଗ୍ ଆସ୍ ଦର୍ପ ମାଡ଼ମ୍ । ମାମ୍‌ମେ ଆଗେ ମାଡ଼ତୁମ୍ ଯେ, ମିଡ଼ ବିଶ୍ବାସ୍‌ତେ ଉନ୍ନତି ମାଡ଼ାନ୍ ସାଙ୍ଗେ ସାଙ୍ଗେ ମିୟାଗାଙ୍କ୍ ମିକା ମାୟାଦ୍ ପାଡ଼ୟି ଝାୟେ ମେଣ୍ଡେ ପ୍ରସାରିଡ଼ ଆଡ଼ତେ । ବାତେଙ୍କ ଇଡ଼କେ ଇଦ୍ ଇଶ୍ବର ମାଡ଼ିମାନ୍‌ସନ୍ ସୀମାଡ଼ ବାୟିଦେ ଆଦାନାଦ୍ ଆୟ୍‌ୟ ।

୧୬ ଆଲେକେ, ବାଗାତଡ଼ ପାଡ଼ୟି ଝାୟେତାଗ୍ ଆସ୍‌ମାନ୍‌ସନ୍ ପାଡ଼ୟି ସେଙ୍ଗେ ଗର୍ବ ମାଡ଼କର୍ ମିୟାଦ୍ ସୀମା ବାଇଦେ ମେଣ୍ଡନ୍ ଦେଶ୍‌ତାଗ୍ ମିକା ମାମ୍‌ମେ ସୁସମାଚାର୍ ପ୍ରଚାର ମାଡ଼େ ପାର୍‌ଦ୍‌ତାଡ଼ ।

୧୭ ଦର୍ମଶାସ୍ତ୍ରତାଗ୍ ଲେକାମିୟେ, “ବେନ ଗାଇ ମାଡ଼ାନଙ୍କ୍ ଇଚ୍ଛା ମାଡ଼ିତନ୍, ଅଣ୍ ପ୍ରବୁନ୍ ପାଡ଼ୟି ସେଙ୍ଗେ ଗର୍ବ ମାଡ଼ିଣ୍ ।”

୧୮ ନିଜେଡ଼ ପ୍ରସଂଶା ତଡ଼ ବେନ ସ୍ବାକୃତି ଦସ୍ କି ଆୟ୍‌ୟଣ୍ଡ, ବେନ ପ୍ରବୁନ୍ କଣ୍ଡେତେ ଲେକାମ୍, ଅଣ୍ଡେକେ ମାଡ଼ର୍ ତାନ୍ ଗ୍ରହନ୍‌ଯୋଗ୍ୟ ।

୧୧

ପାଉଲ୍ ନୁ ବଣ୍ଡ ଶିଷ୍ୟ

୧ ନାନ୍ ଇଚ୍ଛା ମାଡ଼ତୁନ୍, ବାତେବା ବିଷୟତେ ସୁଦୁର୍ ମଣ୍ଡି ଆଡ଼କେ ମିକା ମିଇଡ଼ ନାକିଙ୍କ୍ ସାରେ ମାଡ଼ିତିଡ଼ ।

୨ ମିଇ ମୁନ୍‌ନେ ଝେରଡ଼ ଐଶ୍ବରିକ୍ ଇର୍ଷାତେ ନା ହୃଦୟତାଗ୍ ମିୟେ । ବାତେଙ୍କ ଇଡ଼କେ ମିଇଡ଼ ପବିତ୍ର କୁମାରି ପିକ୍‌ତେ ଲେକାମ୍ ।

ଝେରଡ଼ ମାତର କ୍ରିଷ୍ଣନ୍ ତଡ଼ ମିୟାଦ କାଲ୍‌ପିଦାନ୍ ସେଙ୍ଗେ ନାନ୍‌ନେ ପ୍ରତିଜ୍ଞା ମାଡ଼ତାନ୍ ।

୩ ନାକିଂଙ୍କ ଝେର୍ ଝେସୁଡ଼, ତାଡ଼ାମ୍‌ତେ ଚାଲାକ୍ ତଡ଼ ପ୍ରତାରିତ ଆଦଦାନ୍ ଲେକାମ୍ ମିଡ଼ ବେସୁଙ୍କ କ୍ରିଷ୍ଣନ୍ ସେଙ୍ଗେ ମିୟାଦ ସାରେ ସରଲ୍ ବିଶ୍ୱାସ୍‌ତେ ମାର୍‌ଜି ଆଦତିଡ଼ ।

୪ ବାତେଙ୍କିକ୍‌କେ ବେନ ଯଦି ଝାସ୍ ମାମ୍‌ମେ ପ୍ରଚାର ମାଡ଼ିମାନ୍‌ଦାନ୍ ଜିସୁଙ୍କ ଝିଡ଼ସି ମେଣ୍ଡେ ବେନନ୍ ଜିସୁନ୍ ଗର୍ ପ୍ରଚାର ମାଡ଼ିତନ୍ ବା ମିଇଡ଼ ଦର୍ସକ୍ ମାନ୍‌ଦାନ୍ ପବିତ୍ରଆମ୍ବା ଝିଡ଼ସି ମେଣ୍ଡନ୍ ବେନ୍ ଆମ୍ବାତେ ଗଟି କେଡିତଡ଼ ବା ମିଡ଼ ଗ୍ରହନ୍ ମାଡ଼ିମାନ୍‌ଦାନ୍ ସୁସମାଚାର ଝିଡ଼ସି ବେନେବା ସୁସମାଚାର ପ୍ରଚାର ମାଡ଼ିତଡ଼, ମିଡ଼ ଆଦ ଗ୍ରହନ୍ ମାଡ଼ିମାନ୍‌ଦ ।

୫ ମିୟାଦ ଆଦ ବିଶିଷ୍ଟ ପ୍ରେରିତ ଶିଷ୍ୟତାଗାଙ୍କ ନାନ୍‌ନେ ବେନ୍ ବା ଗୁଣତେ ନିକୃଷ୍ଟ ଇଞ୍ଜ ଆଲ୍‌ସନ୍ ।

୬ ନାନ୍ ଅଡ଼ଲେକାମ୍ ବାକ୍‌ପଟୁ ଆଦେ ପାଞ୍ଜନ୍, ବାତେଙ୍କି ଇଡ଼କେ ନାନ୍ ବୁଦ୍‌ତେ ନିସ୍‌ଚୁର୍ ଆୟନ୍ । ମିକିଂଙ୍କ ଇଦ୍ ଗର୍ ମାମ୍‌ମେ ସାରେଦାମ୍ ନୁ ସାରେ ସମୟତେ କେସ ଝାଡୁତମ୍ ।

୭ ଇଶ୍ୱର୍‌ତେ ସୁସମାଚାର ପ୍ରଚାର ମାଡ଼ାନ୍ ଝେଲେ ନାନ୍ ମିଇୟାଗାଙ୍କ ଇଦିନ୍ ମୂଲ୍ୟ ଦାବା ମାଡ଼ନ୍ । ମାଇୟାଦ ଉନ୍ନତି ସେଙ୍ଗେ ନାନ୍ ନିଜେଡିଙ୍ଗ୍ ଅବନଡ଼ ମାଡ଼ତାନ୍ । ଇଦ୍ ବାତେଏ ନାୟାଦ ପାପ୍ ?

୮ ମିଇୟାଗେ ପାଡ଼୍‌ୟି ମାଡ଼ାନ୍ ଝେଲେ ନାନ୍ ବାଗାଡ଼ ମଣ୍ଡଲିନାଗାଙ୍କ ଆଡ଼ିକ ସାହାଯ୍ୟ ପାଏମ୍ ଆଡ଼ତାନ୍ । କେଡାଙ୍କ ଆଡ଼କେ, ମିୟାଦ ଉପକାର ସେଙ୍ଗେ ନାନ୍ ଅଡ଼କିଂଙ୍କ ଲୁଣନ୍ ମାଡ଼ତାନ୍ ।

୯ ☆ମାଇତଡ଼ ମାନ୍‌ଦାନ୍ ଝେଲେ ନାୟାଦ ସାରେ ଅବାବ୍ ସେଙ୍ଗେ ନାନ୍ ବେନଙ୍କି ବାରଗ୍ରସ୍ତ ମାଡ଼ନ୍ । ବାତେଙ୍କିକ୍‌କେ ମାସିଦୋନିଆତାଗାଙ୍କ ଝାସ୍‌ମାନ୍‌ଦାନ୍ ଦାଦାନଡ଼ ନାୟାଦ ସାରେ ଅବାବ୍ ମେଣ୍ଡାଇ ଇସମାଡ଼ତଡ଼ । ଅଡିତି ଲେକାମ୍ ବବିଷ୍ୟତ୍‌ତେ ମିକା ନାନ୍ ବେସୁଙ୍କିବା ମିକିଂଙ୍କ ବାରଗ୍ରସ୍ତ ମାଡ଼ନ୍ ।

୧୦ ନା ହୃଦୟତାର ମାନ୍ୟତା କ୍ରିଷ୍ଣନାଦ୍ ସତ୍ୟତେ ନରସ୍ ମିଳା
ନାନ୍ ପ୍ରତିଜ୍ଞା ମାଡ଼ି କେତୁତାନ୍ ଯେ, ଆକାୟା ଦେଶ୍‌ରେ ବେନେବା
ନାରଦାର୍ ନାୟାଦ୍ ଇଦ୍ ଗର୍ବତିଙ୍କ୍ ବେନ କଣ୍ଡନ୍ ମାଡ଼େ ପାର୍‌ଝଡ଼୍ ।

୧୧ ନାନ୍ ବାତେଙ୍କ୍ ଇଦ୍‌ଲେକାମ୍ କେତୁତାନ୍ ? ନାନ୍ ବାତେଏ
ମିଇକିଙ୍କ୍ ପ୍ରେମ ମାଡ଼ନ୍ ? ଇଶ୍‌ର ପୁତ୍ରନ୍, ମିଇକିଙ୍କ୍ ନାନ୍ ବେସର୍
ପ୍ରେମ ମାଡ଼ୁତାନ୍ ।

୧୨ ବାତେଙ୍କ୍ ଇଡ଼କେ ଇଞ୍ଜେ ନାନ୍ ବାତେ ମାଡ଼ୁତାନ୍, ଆଦ୍ ମାଡ଼
ମାନ୍‌ତାନ୍ । ଆଲେକେ, ମାନ୍ ଲେକାମ୍ ପାଡ଼ୁୟି ମାଡ଼ୁତୁଡ଼୍ ଇଞ୍ଜ
ବେନଡ଼୍ ଗର୍ବ ମାଡ଼ିତଡ଼୍ ଅଡ଼୍ ମେଣ୍ଡେ ଆଦ୍ ମେଣ୍ଡେ ମାଡ଼େପାର୍‌ଝଡ଼୍ ।

୧୩ ଅଡ଼୍ ମୁନେଙ୍କ୍ କଞ୍ଜ ଶିଷ୍ୟ ଆୟୁୟଡ଼୍ ଅଡ଼୍ ସାରେତଡ଼୍ ଟକୁଞ୍ଜାନଡ଼୍
। ଅଡ଼୍ ନିଜେଡ଼୍ ପାଡ଼ୁୟି ବିଷୟତେ ମିଡ଼୍ କେତିତଡ଼୍ ନୁ କ୍ରିଷ୍ଣଙ୍କ୍ ପ୍ରେରିଡ଼୍
ଶିଷ୍ୟ ଲେକାମ୍ ଉଡ଼ାନ୍ ସେଙ୍ଗେ ସହ୍‌ଦାନ୍ କେରଡ଼୍ ।

୧୪ ଇଗେ ବାକ୍‌ଝା ଆଦାନାଦ୍ ବାତେଏ ଆୟୁୟ, ବାତେଙ୍କ୍ ଇଡ଼କେ
ଶୟତାନ୍ ମିଳା ଖେସ୍‌ରେ ଜତିର୍‌ମୟ ସ୍ୱର୍ଗଦୂତନ୍ ଲେକାମ୍ ତନ୍‌ଦାନ୍
ସେଙ୍ଗେ ସହ୍‌ବେଶ ଲେକାମ୍ ଝାଦତା ।

୧୫ ଆଦିଙ୍କ୍ ତାନ୍ ପେରକେ ଆଦାନଡ଼୍ ଦାମ୍‌କ୍ ସେବାନଡ଼୍
ସହ୍‌ବେଶ ଝାଡ଼କେ, ଆଶ୍‌ର୍ଯ୍ୟ ଆଦାନାଦ୍ ବାତେଏ ଆୟୁୟ, ବାତେଙ୍କ୍
ଇଡ଼କେ ପେରକେ କାମ୍‌ତେ ଯୋଗ୍ୟତେ ଦଣ୍ଡ ଅଡ଼୍ ଆଦତଡ଼୍ ।

ପ୍ରେରିଡ଼୍ ଶିଷ୍ୟଲେକାମ୍ ପାଉଲ୍‌ତେ କଷ୍ଟ

୧୬ ନାନ୍ ମେଣ୍ଡନ୍‌ଦାମ୍ କେତୁତାନ୍, ବେନ ବେଲାନ ନାକିଂଙ୍କ୍ ମଣ୍ଡି
ଇଞ୍ଜ ହେର୍‌କା ମାଡ଼ଣ୍ । ଯଦି ଆଦ୍‌ଲେକାମ୍ ଏର୍‌କା ମାଡ଼ାଟ୍, ଆଲେକେ
ନାକିଂଙ୍କ୍ ମଣ୍ଡି ଲେକାମ୍ ଗ୍ରହନ୍ ମାଡ଼ାଟ୍, ଆଲେକେ ନାନ୍ ଦର୍ପ
ମାଡ଼ାନଙ୍କ୍ ସାମାନ୍ୟ ସୁଯୋଗ୍ ପାଏମ୍ ଆଦତନ୍ ।

୧୭ ନିଜାମ୍ ଇଞ୍ଜେ ନାନ୍ ବାଡ଼କେତୁତାନ୍, ଆଦିନ୍ ସେଙ୍ଗେ ପ୍ରବୁ
ନାକିଂଙ୍କ୍ ଗର୍ ଇଞ୍ଜଣ୍ । ବାତେଙ୍କ୍‌ଇକ୍ ଗର୍ବ ମାଡ଼ାନ୍ ବିଷୟତେ ନାନ୍
ପ୍ରକୃତ୍‌ରେ ମୁର୍‌କ୍ ନାରିନ୍ ଲେକାମ୍ ଗଟି କେତୁତାନ୍ ।

୧୮ ବାତେଙ୍କ୍ ଇଡ଼କେ ଜାଗତିକ୍ ବିଷୟତେ ନାରଗେ ବେଲାନ ଗର୍ବ
ମାଡ଼ିତଡ଼୍, ନାନ୍ ମିଳା ଆଦେଲେକାମ୍ ମାଡ଼େ ପାର୍‌ଦତାନ୍ ।

୧୯ ମୀଇଡ଼୍ ଜାନି ଆସ୍ ମିକା ଖେଡ଼କେତେ ମୁର୍ଜନଡ଼କ୍ ସାରେ ମାଡ଼ଡ଼ିଡ଼୍ ।

୨୦ ବେନ୍ ମିଇ ପରୁ ଦାସ ଲେକାମ୍ ପ୍ରବୁଡ଼୍ ବିସ୍ତାର ମାଡ଼କେ, ମୀଇୟାଦ୍ ସାରେପାକ୍ ଆଦପ୍ତା ମାଡ଼କେ, ମିକିଂଙ୍କ ଉଡ଼ାଇଦାଗ୍ ଖାଟକେ, ମିକିଂଙ୍କ ଗୁଣାମାଡ଼କେ, ଇଦଲେକାମ୍ କି ମିଇ ବୁକ୍ତାଗ୍ ତାପୁଡ଼ା ରେହେକେ ମିକା ମିଡ଼୍ ଅଂକିଂଙ୍କ ବର୍ଦାସ୍ ମାଡ଼ିଡ଼ିଡ଼୍ ।

୨୧ ନାନ୍ ସିଗ୍ତଡ଼୍ ସ୍ୱୀକାର ମାଡ଼ତାନ୍ ଯେ, ଇଦସାରେ ବିଷୟତେ ନାନ୍ ଅଦିକ୍ ଦୁର୍ବଲ୍ । ବାତେଙ୍କ ଇଡ଼କେ ମେଣ୍ଡେ ବେନ୍ ବିଷୟତେ ବେନ ଯଦି ଦର୍ପ ମାଡ଼ାଙ୍କ ଶକ୍ତି ମାଡ଼ିଡ଼ନ୍, ଆଲେକେ ମଣ୍ଡିନ୍ ଲେକାମ୍ ନାନ୍ କେଡୁତାନ୍ ନାୟାଦ୍ ଆଦଲେକାମ୍ ଶକ୍ତିମିନ୍ଦେ ।

୨୨ ଅଡ଼୍ ବାତେଏ ଏବ୍ରିୟ ? ନାନ୍ ମିକା ଏବ୍ରିୟ । ଅଡ଼୍ ବାତେଏ ଇସ୍ରାଏଲିୟ ? ନାନ୍ ମିକା ଇସ୍ରାଏଲିୟ । ଅଡ଼୍ ବାତେଏ ଅବ୍ରାହାମ୍ତେ ବଂଶତଡ଼୍ ? ନାନ୍ ମିକା ଅବ୍ରାହାମ୍ତେ ବଂଶତନ୍ ।

୨୩ ✧ ଅଡ଼୍ ବାତେଏ କ୍ରିଷ୍ଟନ୍ ସେବାତଡ଼୍ ? ନାନ୍ ବାୟାନ୍ ଲେକାମ୍ କେଡୁତାନ୍, ନାନ୍ ଅଡ଼୍ ଆଗାଙ୍କ ଲେକେଡ଼୍ ଦାସ । ନାନ୍ ଅଡ଼୍ ଆଗାଙ୍କ ଅଦିକ୍ କଷ୍ଟ ମାଡ଼ତାନ୍, ଅଦିକ୍ ଜେଲ୍ଦାଗ୍ ମାଡ଼ତାନ୍ ନୁ ବେତଦେବେ ତିଡ଼ତାନ୍ ନୁ ନାର୍ଗେଦାମ୍ ତଲାନ ଲେକାମ୍ ଆସ୍ମାତାନ୍ ।

୨୪ ଏଇଙ୍କ୍ ଦାମ୍ ନାନ୍ ଯିହୁଦିତାଗାଙ୍କ ତିରିଶ୍ ନଅଟାନ୍ ବେତଦେବ୍ ତିଡ଼ତାନ୍ ।

୨୫ ✧ ରୋମିୟ ନାରୁଡ଼ାଗାଙ୍କ ମୁଣ୍ଡଦାମ୍ ତାବୁକ୍ତେ ଦେବ୍ ତିଡ଼ତାନ୍ । ଅଣ୍ଡ୍ ଦାମ୍ କାଲ୍ କିନ୍ ତୋଡ଼୍ ଦେବା ତିଡ଼ତାନ୍ । ମୁଣ୍ଡ୍ ଦାମ୍ ଜାହାଜ୍ ଦୁର୍ଗଟନାତେ ମୁନେ ଆଡ଼ତାନ୍ ନୁ ଅଣ୍ଡ୍ ଦାମ୍ ସମୁଦ୍ର ଏର୍ଦାଗ୍ ନାର୍କେଡ଼ ପାୟାଲ୍ ବା ଚବିଶ୍ ଗାଣ୍ଡା କାଟେମ୍ ଆଡ଼ତାନ୍ ।

୨୬ ✧ ନାର୍ଗେ ଦାମ୍ ଆଦାନ୍ ଖେଲେ ସମୁଦ୍ର ନାଡ଼ମେ, ଦସ୍ୟୁନଡ଼୍ କାଇଦେ, ସ୍ୱଜାତି ଇହୁଦି ନୁ ବିଜାତିନଡ଼୍ କାଇଦେ, ନାର୍ଦାଗ୍ ନୁ ପ୍ରାଡ଼ରୁଡ଼ାଗ୍, ସମୁଦ୍ରତାଗ୍, ପଟ୍ଟକାର୍ ବୟନଡ଼୍ ତ ବିପଦ୍ତାଗ୍ ମୁନେ ଆଡ଼ତାନ୍ ।

୨୭ ଗାଟି ତିପାଲ୍ ଆଡ଼ତାନ୍ ନୁ ଦୁଃକାମ୍ କଷ୍ଟ ଆଡ଼ତାନ୍, ଉସ୍ତାଡ଼ତେ

✧ ୧୧:୨୩ ପ୍ରେରିତ ୧୭:୨୩.

✧ ୧୧:୨୫ ପ୍ରେରିତ ୧୭:୨୨; ପ୍ରେରିତ ୧୪:୧୯.

✧ ୧୧:୨୬ ପ୍ରେରିତ ୯:୨୩; ପ୍ରେରିତ ୧୪:୫.

ନୁ କାର୍ତ୍ତିନ ଏର ଉନ୍ନେ ନାରଗେ ଦିନା କଟେମ୍ ଆଡ଼ତାନ,
ଲେକେଡ଼ କାଦି, ଚକା ନୁ ମାୟାନ୍ ପଡ଼ିୟେ ଅବାବତେ ନାରଗେ କଷ୍ଟ
ଆଡ଼ତାନ ।

୨୮ ଆଦେଲେକାମ୍ ସାରେ ମଣ୍ଡଲି ସେଙ୍ଗେ ନ୍ନାୟାଦ୍ ଦାୟିତ୍ବ
ସାରେଦିନ୍ ବହନ୍ ମାଡ଼ି ଚାଲେମ୍ ଆଡ଼ତେ ।

୨୯ ବେନ ଯଦି ଦୁର୍ବଲ୍ ଆସମାନନ୍ତନ୍, ନାନ୍ ମିକା ଅନ୍ତତ୍ ଦୁର୍ବଲ୍
ଲେକାମ୍ ଏକା ମାଡ଼ିତାନ । ବେନ ପାପ୍ ମାଡ଼କେ, ନାନ୍ ଜିଞ୍ଜେତାଗ୍
ଦୁଃକାମ୍ ଏକା ମାଡ଼ିତାନ ।

୩୦ ଯଦି ଦର୍ପ ମାଡ଼ାଙ୍କ୍ ଆଡ଼କେ, ଆଲେକେ ନା ଇଞ୍ଜୁସାରେ
ଦୁର୍ବଲ୍ତେ ସେଙ୍ଗେ ନାକିଂଙ୍କ୍ ଦର୍ପ ମାଡ଼ାଙ୍କ୍ ଆଦତେ ।

୩୧ ପ୍ରବୁ ଜିସୁ କ୍ରିଷ୍ଟନ୍ ବାବାଲ୍ ଇଶ୍ବର ଯୁଗ୍ମୟୁଗ୍ମ ଦନ୍ୟ ଆଇନା । ଅଣ୍ଡ
ପୁଡ଼ତନ୍ ଯେ, ନାନ୍ ମିର୍ କେଲନ୍ ।

୩୨ ☆ନାନ୍ ଦାମାସ୍କସ୍ ତାଗେ ମାୟାନ୍ ଖେଲେ ରାଜା
ଆରେଟସ୍ତେ ଗର୍ତ୍ତେ ଶାସନକର୍ତ୍ତାଲ୍ ନାକିଂଙ୍କ୍ ଗିରାପ୍ ମାଡ଼ାନ୍
ସେଙ୍ଗେ ନଗର୍ତ୍ତେ ସାରେପାକେ କେପାନଡ଼କିଂଙ୍କ୍ ଏଞ୍ଜି ମାଡ଼ତନ୍ ।

୩୩ ବାତେଙ୍କ୍ ଇକ୍ଟେ ନାକିଂଙ୍କ୍ ଜୁଡ଼ି ସାହାୟତେ ନଗର୍ତ୍ତେ ନେଟେଡ଼
ଜରକା ବାଇଦେ ଖେହେସ୍ ମାଡ଼ତଡ଼ । ଇଦ୍ ଲେକାମ୍ତେ ନାନ୍ ଆଦ୍
ଶାସନକର୍ତ୍ତାନ୍ କାଇଦାଗାଙ୍କ୍ ରକ୍ଷା ପାଏମ୍ ଆଡ଼ତାନ ।

୧୨

ପାଉଲ୍ତାଦ୍ ଦର୍ଶନ୍

୧ ବାତେଏ ଲାବ୍ ଆୟକ୍ ମିକା ନାକିଂଙ୍କ୍ ନିଜାମ୍ ଦର୍ପ ମାଡ଼ାଙ୍କ୍
ଆଦତେ । ବାତେଙ୍କ୍ ଇଡ଼କେ ପ୍ରବୁ ନାକିଂଙ୍କ୍ ବେନ୍ସାରେ ବିଦ୍ୟା
ଇଡ଼ତନ୍ ନୁ ପ୍ରତ୍ୟାଦେଶ୍ ଇଡ଼ତନ୍, ହାଉସାରେ ଇଞ୍ଜେ ନାନ୍
ଲେକିତାନ ।

୨ କ୍ରିଷ୍ଟନ୍ ଖେରଣ୍ଡ ନାରୁଡ଼, ଚଉଦ ଖାଡ଼ଷା ମୁନେଙ୍କ୍ ତୃତୀୟସ୍ବର୍ଗ
ଯାକ ଆଞ୍ଜିମାଡ଼ତନ୍ ଅଣ୍ଡ ମେନ୍ଦୁଲ୍ତେ ଆଞ୍ଜିମାଡ଼ତଣ୍ଡ ବାତେଙ୍କ୍
ଇଡ଼କେ ଦର୍ଶନ୍ ଉଡ଼ିମାଡ଼ତଣ୍ଡ, ନାନ୍ ପୁନନ୍, ଆଦ୍ ମାଡ଼ର ଇଶ୍ବର
ପୁଡ଼ତନ୍ ।

୩ ହଁ ନାନ୍ ପୁତ୍ରତାନ୍, ଅଣ୍ଡ ଅଂକିଙ୍କ ସ୍ୱର୍ଗତାଗେ ଆସ୍ମାତ୍ତନ୍ ଇଦ୍ ମୁନେଙ୍କ ପୁତ୍ରତାନ୍ ଅଣ୍ଡ ଗଟେମ୍ ଆସ୍ମାତ୍ତେ ଆଦ୍ ଦର୍ଶନ୍ ଉଡ଼ିମାତ୍ତନ୍, ନାନ୍ ପୁନନ୍, ମାତର୍ ଇଶ୍ୱର୍ ପୁତ୍ରତନ୍ ।

୪ ଆଗେ ଅଣ୍ଡ ଗଟି କେତ୍ତେ ପାର୍ୱାଦ୍ ନୁ ଲେଙ୍ଗ୍ ମାତ୍ତ୍ରେ ପାର୍ୱାଦ୍ ଲେକାମ୍ କେଞ୍ଜାଙ୍କ୍ ପାତ୍ତନ୍ ।

୫ ଇ ନାରିନ୍ ସେଙ୍ଗେ ନାନ୍ ଗର୍ବ ମାଡ଼ିତାନ୍ । ବାତେଙ୍କ୍ ଇତ୍ତକେ ନିଜେତ୍ ଦୁର୍ବଲ୍ତେ ସେଙ୍ଗେ ମେଣ୍ଡେ ବାତେଏ ବିଷୟ୍ତେ ନାନ୍ ଗର୍ବ ମାଡ଼ନ୍ ।

୬ ଗର୍ବ ମାଡ଼ାନାଦ୍ ନା ପାକେ ମୁର୍କ୍ ଆୟନ୍ତ୍, ବାତେଙ୍କ୍ ଇତ୍ତକେ ନାନ୍ ସତ୍ତର୍ କେଡିତାନ୍ । ବାତେଙ୍କ୍ ଇତ୍ତକେ ନାନ୍ ଗର୍ବ ମାଡ଼ନ୍, ବାତେଙ୍କ୍ ଇତ୍ତକେ ନାନ୍ ଆଲ୍ପୁତାନ୍, ନାରୁଡ୍ ନାକିଂଙ୍କ୍ ବେଲାନ୍ ପାଡ଼ିୟି ମାଡ଼ାନାଦ୍ ଉଡ଼ିତଡ୍, ବା ନାୟାଗ୍ କଞ୍ଜ ବେଲାନ୍ ଗର୍ବ କେଞ୍ଜିତଡ୍, ଆଗେଙ୍କ୍ ନାକିଂଙ୍କ୍ ବେଡ଼ିୟନ୍ ଇଞ୍ଜ ଏକା ମାଡ଼ିମାକିଡ୍ ।

୭ ଇଦ୍ ବାଗାଡ୍ ମାଦାନ୍ ଦେଶ୍‌କିନାଗ୍ ଲାବ୍ ମାଡ଼ି ନାନ୍ ବେଲାନ୍ ଆଂକାର୍ ଆଦାଙ୍କ୍ ଆୟନ୍ତ୍, ଆଦିନ୍ ସେଙ୍ଗେ ନା ମେନ୍ଦୁଲ୍ତାଗ୍ ଝେରଡ୍, ଯନ୍ତ୍ରନାଲେକାଡ୍ ବ୍ୟାଦି ଇତ୍ତତଡ୍, ଇଦ୍ ନାକିଂଙ୍କ୍ ଆଗେ ଆୟ୍‌ଝାଙ୍କ୍ ଶୟ୍ତାନ୍ତେ ଦୂଡ଼ିଙ୍କ୍ ରଡ଼ତେ ।

୮ ଆଦିଙ୍କ୍ ନାନ୍ ଅନାଗାଙ୍କ୍ ଯେକେ ଆଦାନ୍ ସେଙ୍ଗେ ନାନ୍ନେ ପ୍ରବୁନାଗେ ଆଦ୍ ବିଷୟ୍ତେ ମୁଣ୍ଡଦାମ୍ ପ୍ରାର୍ଥନା ମାଡ଼ିତାନ୍,

୯ ବାତେଙ୍କ୍ ଇତ୍ତକେ ଅଣ୍ଡ ନାକିଂଙ୍କ୍ କେତ୍ତକେ, “ନାୟାଦ୍ ଅନୁଗ୍ରହ ମିଇ ସେଙ୍ଗେ ଆଦ୍ତେ, ବାଡ଼ିଙ୍କ୍ ଇତ୍ତକେ ମିୟାଦ୍ ଦୁର୍ବଲ୍ତାତେ ମାୟାଦ୍ ଶକ୍ତି ସିଦ୍ ଆଦ୍ତେ ।” ଆଦିଙ୍କ୍ କ୍ରିଷ୍ଟନ୍ ଶକ୍ତି ନାୟାଗେ ଅଦିଷ୍ଟାନ୍ ମାଡ଼ାନ୍ ସେଙ୍ଗେ ନାନ୍ ନାୟାଦ୍ ଦୁର୍ବଲ୍ତାଦ୍ ସେଙ୍ଗେ ଅଦିକ୍ ଗର୍ବ ମାଡ଼ିତାନ୍ ନୁ ଝେଡେକେ ମାଡ଼ିତାନ୍ ।

୧୦ କ୍ରିଷ୍ଟନ୍ ସେଙ୍ଗେ ସାରେଲେକାମ୍ ଦୁର୍ବଲ୍ତେ, ଅପମାନ୍, କଷ୍ଟ, ଗାଟିପାଲ୍ ନୁ ଆପଦ୍ ବିପଦ୍ ନାନ୍ ସୁକାମ୍ତେ ମାନ୍ତାନ୍, ବାତେଙ୍କ୍ ଇତ୍ତକେ ବେସୁଙ୍କ୍ ନାନ୍ ଦୁର୍ବଲ୍, ଆସୁଙ୍କ୍ ନାନ୍ନେ ଶକ୍ତିନଡ୍ ।

କରିନ୍ତିତେ ନାରୁଡ୍ ସେଙ୍ଗେ ପାଉଲ୍ତେ ଏକା

୧୧ ନାନନେ ମଣ୍ଡିନ୍ ଲେକାମ୍ ଆଚରନ୍ ମାଡ଼ତାନ୍ । ଇଦ୍ ମାଡ଼ାନ୍ ସେଙ୍ଗେ ମିଡ଼୍ ନାକିଂଙ୍କ ଦାନ୍ଦେ ମାଡ଼ତିଡ଼୍, ବାତେଙ୍କିଇଡ଼କେ ନାୟାଦ୍ ପ୍ରସଂଗା ମାଡ଼ାନାଦ୍ ମିୟାଦ୍ ନିୟମ୍ ମାଡ଼ତେ । ନାନନେ ବାତେଏ ଆୟକ୍ ମିକା ମିୟାଦ୍ ଆଦ୍ ମାନ୍ଦାନ୍ “ପ୍ରେରିଡ଼ ଶିଷ୍ୟନଡ଼ାଗାଙ୍କ୍,” ବାତେଏ ବା ଗୁନତେ ନିକୃଷ୍ଟ ଆୟ୍ଯ ।

୧୨ ମିୟାଗ୍ ମାନ୍ଦାନ୍ ଦର୍ଯ୍ୟତେ ନାରଗେ ବାକ୍ସା ଆଦାନ୍ ପାଡ଼ୟି ତିଆର୍ ମାଡ଼ି ନାରଗେ ଆଦବୁଡ଼ ବିଷୟ ତଡ଼୍ ନାନ୍ ଯେ ମୁନେଡ଼କଞ୍ଜ ପ୍ରେରିଡ଼ ଶିଷ୍ୟ, ଇଦିନ୍ ନିଦର୍ଶନ ଇଡ଼ତନ୍ ।

୧୩ ମାତର୍ ଖେରଡ଼୍ ବିଷୟତେ ବାଗାତଡ଼୍ ମାଣ୍ଡୁଲିନାଗାଙ୍କ୍ ମିଇ ତଡ଼୍, ନାୟାଦ୍ ବ୍ୟବହାର୍ ଖେରେ ଆଡ଼ତେ । ଯଦି ଇଦ୍ ମିଇ ସେଙ୍ଗେ ନାୟାଦ୍ ଜିଞ୍ଜୁତେ ବ୍ୟବହାର୍, ଆଲେକେ ଆଦିନ୍ ସେଙ୍ଗେ ନାକିଂଙ୍କ ଦୟା ମାଡ଼ି କ୍ଷମା ମାଡ଼େ । ନାନ୍ ମିକିଂଙ୍କ ଡାବ୍ କ୍ ସାହାଯ୍ୟ ଡାଲାକାନ୍ ସେଙ୍ଗେ ନାନ୍ ମିଇ ପରୁ ବୋଜ୍ ଇଞ୍ଜନ୍ ।

୧୪ ତୁତିୟ ଦାମ୍ ମିଇ ପାକେ ଆଦାନ୍ ସେଙ୍ଗେ ନାନନେ ତିଆର୍ ଆସମିନ୍ଦେନ୍ । ନାନ୍ ମିୟାଗାଙ୍କ୍ ବାତେବା ବିଷୟ ଦାବୀ ମାଡ଼ନ୍ । ନାନ୍ ମିକିଂଙ୍କ ଇଚ୍ଛା ମାଡ଼ତୁନ୍ । ମିୟାଦ୍ ବୁମନେଲ୍ ଆୟ୍ଯ । ବାତେଙ୍କିଇଡ଼କେ ଯାୟ୍ ବାବାନ୍ ସେଙ୍ଗେ ପିଲାପିସ୍କା ଗୁଡ଼ପନ୍, ଯାୟ୍ ବାବାଲ୍ ପିଲାପିସ୍କାନ୍ ସେଙ୍ଗେ ଗୁଡ଼ପି ମାନ୍ତଡ଼୍ ।

୧୫ ମିଇକିଂଙ୍କ ସାହାଯ୍ୟ ମାଡ଼ାନ୍ ସେଙ୍ଗେ ନାୟାଦ୍ ସର୍ବସ୍ୱ, ଇଦ୍ଲେକାମ୍ କି ନିଜେତିଙ୍ଗ୍ ଖେଡ଼କେତେ ଉତ୍ସର୍ଗ ମାଡ଼ିଇଦାନ୍ ସେଙ୍ଗେ ନାନ୍ ତିଆର୍ । ନାନ୍ ମିକିଂଙ୍କ ଇସର୍ ଅଦିକ୍ ପ୍ରେମ ମାଡ଼ତୁନ୍ ଇଞ୍ଜ ମିଇଡ଼୍ ବାତେଏ ନାକିଂଙ୍କ ଇସର୍ ସୁଦୁର୍ ପ୍ରେମ ମାଡ଼ିତିଡ଼୍ ?

୧୬ ନାନ୍ ମିଇ ପରୁ ମପ୍ ଲେକାମ୍ ଆୟ୍ଯନ୍ । ଇଦ୍ ଗର୍ ମିଡ଼୍ ନିଜାମ୍ ସ୍ୱିକାର୍ ମାଡ଼ିତିଡ଼୍ । ବାତେଙ୍କି ଇଡ଼କେ ମିୟାଗାଙ୍କ୍ ବେନ କେଡ଼ତେ ପାରତଡ଼୍, ନାନ୍ ଦୂର୍ଭ ଆସ୍ମାନନାଙ୍କ୍ ଖିଗାମ୍ କେସ୍ ମିକିଂଙ୍କ ଉଡ଼ିଇଦାଗ୍ ଖାଟତାନ୍ ।

୧୭ ମିଇ ପାକେ ବେନଡ଼୍ ରଡ଼ତାନ୍, ଅଡ଼୍ ଡାଗାଙ୍କ୍ ବେନନ୍ତଡ଼୍, ନାନନେ ବାତେଏ ମିୟାଗାଙ୍କ୍ ବାତେଏ ସୁବିଦା ହାସଲ୍ ମାଡ଼ତାନ୍ ?

୧୮ ମିଇ ପାକେ ଆଦାନ୍ ସେଙ୍ଗେ ନାନ୍ ତିତସତିଙ୍ଗ୍ ଅନୁରଦ୍ ମାଡ଼ତାନ୍ ନୁ ଅନ୍ ତଡ଼୍ ବାଗାତଡ଼୍ ରଡ଼ତାନ୍ । ତିତସ୍ ମିଇୟାଗାଙ୍କ୍

ବାତେଏ ସୁବିଦା ମାଡ଼ତଣ୍ଡ ଇଞ୍ଜ ବେନ କେତେତେ ପାରଦ୍ଦିନ ? ଅଣ୍ଡ
ନୁ ନାନ ସାମାନ କାମ୍ ଆସ୍ ମିଇ ତଡ଼ ସାରେ ବ୍ୟବହାର ମାଡ଼ମ୍ ?

^{୧୯} ବାତେଙ୍କ ଇଡ଼କେ ମିଡ଼ ଆଲ୍‌ସୁଡ଼ିଡ଼, ଇଞ୍ଜେକ୍ ଆଇନା ମାମ୍‌ମେ
ମାତର୍ ନିଜେଡ଼ ଆଦମି ମିକା ଝାଡ଼ତମ୍ ନା ! ଇଶ୍‌ବର ମାନ୍ଦାନଞ୍ଜେଲେ
କ୍ରିଷ୍ଟନ୍ ଦାସ ଲେକାମ୍ ମାମ୍‌ମେ ମିକିଂଙ୍କ କେତୁତମ୍ । ପ୍ରିୟ ସାଙ୍ଗନଡ଼ି,
ମାମ୍‌ମେ ବାଡ଼ ମାଡ଼ତୁମ୍ ଆଦ ମାତର୍ ମିୟାଦ୍ ଉପକାରଦେ ସେଙ୍ଗେ
ମାଡ଼ତୁମ୍ ।

^{୨୦} ବାତେଙ୍କଈକେ ନାୟାଦ୍ ଝେରେ ଆଦୁଡ଼ତେ, ନାନ ମି ପାକେ
ଆଞ୍ଜ ମିକିଂଙ୍କ ବେଲାନ ଉଡାଙ୍କ ଇଞ୍ଜା ମାଡ଼ତୁନ, ଆଦ ଲେକାମ୍
ଉଡାନଙ୍କ ଦରକ ନୁ ମିଇଡ଼ ନାକିଂଙ୍କ ବେଲା ଉଡାନଙ୍କ ଇଞ୍ଜା ମାଡ଼ଡ଼ିଡ଼,
ଆଦଲେକାମ୍ ଆଦ ଉଡାନଙ୍କ ଆଦତେ । ଆଲେନ୍ ତ ଆଗେଆଞ୍ଜ
ନାନ ବେସ୍ ବେସତାର ବିବାଦ୍, ଇର୍ଷା, କପାମ୍, ସ୍ଵାର୍ତ୍ତପରତା,
ଅପବାଦ୍, ଗର୍ବ, ନୁ ବିଶୁକଲା ଉଡାନଙ୍କ ପାଏମ୍ ଆଦତାନ ।

^{୨୧} ଇଞ୍ଜେ ମିଇ ପାକେ ଆଦାନ ଝେଲେ ଆଲେନ୍ ଇଶ୍‌ବର ମିଇ
ସାକ୍ଷାତ୍‌ତେ ନାକିଂଙ୍କ ଅୟିରାଣ ମାଡ଼ିତଡ଼, ବେନଡ଼ ମୁନେଙ୍କକଞ୍ଜ ପାପ୍
ମାଡ଼ତଡ଼, ବାତେଙ୍କ ଇଡ଼କେ ଅଡାଦ୍ ଅଶୁଚି ପାଡ଼ୟି ମାଡ଼ତାଦ୍, ବାଣ୍ଟା
ନୁ ବ୍ରହ୍ମାଚାର ସେଙ୍ଗେ ଅନୁତାପ୍ ଆୟ୍‌ୟିଡ଼, ଇଦଲେକାମ୍ ନାର୍‌ଗେ
ନାରୁଡ଼୍‌ସେଙ୍ଗେ ନାକିଂଙ୍କ ଦୁଃକାମ୍ ମାଡ଼ାନଙ୍କ ଆଦତେ ।

୧୩

ଶେଷ ଆନୁଯୋଗ୍ ନୁ ଅବିବାଦନ୍

^୧ ଇଦିନ୍ ତଡ଼ କାଲ୍‌ପି ତୃତୀୟଦାମ୍ ନାନ ମିଇ ପାକେ ଝାଡ଼ତାନ
। ଦର୍ମଶାସ୍ତ୍ର ଲେକାମ୍, ଇର୍‌ଝୁ ବା ମୁଝୁଡ଼୍‌ସାକିଙ୍କ ପ୍ରମାନ୍ ତଡ଼ ସାରେ
ଗଟି କେତାନଙ୍କ ଆଦତେ ।

^୨ ମୁନେଙ୍କ ପାପ୍ ମାଡ଼ିମାନ୍ଦାନ ନାରିଡ଼କ୍ ନୁ ବାଗାତଡ଼କ୍ ନାନ
ରେଣ୍ଡେ ଦାମ୍ ଆଗେ ଆଞ୍ଜ କେସ୍‌ମାଡ଼ତାନ ନୁ ଇଞ୍ଜେ ଯେକା ମାଞ୍ଜ
ମିକା କେତୁତାନ ଯେ, ନାନନେ ଇଞ୍ଜେ ଆଡ଼କେ, ବେନ ଦଣ୍ଡତାଗାଙ୍କ
ଝିଡ଼ସ୍ ପାରୁଡ଼ିଡ଼ ।

^୩ କ୍ରିଷ୍ଟ ଯେ ନା ଇସ୍ ଗର୍ କେତୁତନ୍, ଇଦ୍ ବିଷୟତେ ମିଡ଼୍
ଆଲ୍‌ସମାନ୍ଦାନ ସାରେ ପ୍ରମାନ୍ ଦରକିଡ଼ । ନୁ ମିଇ ପାକେ ଅଣ୍ଡ ତାନ

ଶକ୍ତିତେ ପରିଚୟ ଇସ୍‌ମିନ୍‌ନେନ୍ । ମିଇ ସେଙ୍ଗେ ଅଣ୍ଟ ବେସୁଙ୍କ ବା ଦୁର୍ବଲ୍ ଆୟ୍‌ୟଣ୍ଟ ।

୪ ଅଣ୍ଟ ଦୁର୍ବଲ୍ ଆସ୍ କୁଶତାଗ୍ ତଲ୍‌କେ ମିକା ଇଶ୍‌ବରତେ ପରାକ୍ରମତେ ସେଙ୍ଗେ ଇଞ୍ଜେ ଜୀଞ୍ଜୁନ୍ ମିନ୍‌ନେନ୍ । ଅନ୍ ତଡ୍ କାଲି ମିକା ଦୁର୍ବଲ୍ ଆଡ୍‌ତମ୍, ବାତେଙ୍କ୍ ଇଡ୍‌କେ ମିଇ ତଡ୍ ମାୟାଦ୍ ସମ୍ପର୍କତେ ଇଶ୍‌ବରତେ ପରାକ୍ରମତାଗ୍ ଅଂଶି ଆସ୍ କ୍ରିଷ୍ଟନ୍‌ତଡ୍ ମାମ୍‌ମେ ଜିଞ୍ଜୁନ୍ ମାନ୍‌ତମ୍ ।

୫ ନିମ୍ ବିଶ୍ୱାସ୍‌ତେ ମିନ୍‌ନେନ୍ କି ଇଲ୍‌ଲେ, ଆମ୍ ପରିକ୍ଷା ମାଡି ଉଡେ । ନି ହୁଦୟ୍‌ତାଗ୍ ଜିସୁ କ୍ରିଷ୍ଟ ମିନ୍‌ନେନ୍, ଇଦ୍ ଗର୍ ବାତେଏ ପୁନ୍‌ଞ୍ଜିନ୍ ଯଦି ଇଲା ଆୟ୍‌ୟ, ଆଲେକେ ମିଡ୍ ଇଗେ ଅଣ୍ଟୟ୍‌ଦାମ୍ ବିପଲ୍ ଆଦତିଡ୍ ?

୬ ନାନ୍ ଆଗେ ମାଡ୍‌ତୁନ୍, ମିଡ୍ ବୁଜେମ୍ ଆଦତିଡ୍ ଯେ, ମାମ୍‌ମେ ବିପଲ୍ ଆୟ୍‌ମ୍ ।

୭ ମିଡ୍ ବାତେବା ଅନ୍‌ୟାୟ୍ ପାଡିୟିଦାଗ୍ ମାଇ ମାନ୍‌ମାଟ୍, ଆଦିନ୍ ସେଙ୍ଗେ ମାମ୍‌ମେ ଇଶ୍‌ବରତାଗେ ପ୍ରାତନା ମାଡ୍‌ତୁମ୍ । ମାମ୍‌ମେ ଯେ ଇଗେ ନାଗେ ଲାବ୍ ମାଡ୍‌ତମ୍, ଇଦ୍ ମାମ୍‌ମେ ଉଡାନଙ୍କ୍ ଆନମ୍, ବାତେଙ୍କ୍ ଇଡ୍‌କେ ମାମ୍‌ମେ ବ୍ୟର୍ତ୍ତ ଲେକାମ୍ ଆସ୍‌ମାଡ୍‌କେ ମିକା ମିଡ୍, ବେଲାନ୍ କି ସଡ୍‌କାମ୍ ମାଡିତିଡ୍, ଆଦିନ୍ ସେଙ୍ଗେ ପ୍ରାର୍ଥନା ମାଡ୍‌ତୁମ୍ ।

୮ ସଡ୍‌ତେ ବିରୁଦ୍ ଆଚରଣ ମାଡ୍‌ତାନ୍ କ୍ଷମତା ମାୟାଦ୍ ଇଲ୍‌ଲେ, ମାମ୍‌ମେ ମାତର୍ ସଡ୍‌ତେ ପାକେ ପାଡିୟି ମାଡ୍‌ତେ ପାର୍‌ତମ୍ ।

୯ ମାମ୍‌ମେ ଦୁର୍ବଲ୍ ମାନ୍‌ନାନ୍‌ଝେଲେ ମିଡ୍ ଡାରୁମ୍ ମାନ୍‌ନାଙ୍କ୍ ମାମ୍‌ମେ ଝେଡ୍‌କ୍ ଆଡ୍‌ତମ୍ । ଆଦିଙ୍କ୍ ମିୟାଦ୍ ମେନ୍‌ଲୁକ୍‌ତେ ଉନ୍ନତି ସେଙ୍ଗେ ମାମ୍‌ମେ ପ୍ରାତନା ମାଡ୍‌ତୁମ୍ ।

୧୦ ଆଦିନ୍ ସେଙ୍ଗେ ଯେକ୍ ମାଞ୍ଜ ନାନ୍ ମିଇ ପାକେ ଇଞ୍ଜୁ ଚିଟି ଲେକୁଡାନ୍, ମିଇ ପାକେ ଝାଦାନ୍ ଝେଲେ ବେଲାନ୍ ଦୁଃକାମ୍‌ତେ ନାକିଙ୍କ୍ ଅଦିକାର୍ ପ୍ରୟଗୋ ମାଡାନଙ୍କ୍ ଆୟ୍‌ୟ । ବାତେଙ୍କ୍‌ଇକେ ମିକିଙ୍କ୍ ଉଠଡାନଙ୍କ୍ ଆୟ୍‌ୟ, ମାତର୍ ତିଆର୍ ମାଡାନଙ୍କ୍ ପ୍ରବୁ ନାକିଙ୍କ୍ କ୍ଷମତା ଇଡ୍‌ତମ୍ ।

୧୧ ଦାଦାନଡି ନୁ ଏଲାୟ୍, ନାୟାଦ୍ ଶେଷଗର୍ ଇଦ୍ ନିଜେତିଙ୍କ୍ ସଂଶୋଦନ୍ ମାଡାଟ୍, ନାୟାଦ୍ ପରାମର୍ଶ ଗ୍ରହନ୍ ମାଡାଟ୍, ସାରେତଡ୍,

ଝେରଡ଼୍ ମନ୍ ଆୟମୁର୍ ନୁ ଶାନ୍ତିତେ ମାନୁର୍ । ପ୍ରେମ ନୁ ଶାନ୍ତିତେ
ଇଶ୍ବର ମିଇ ତଡ଼୍ ମାନିଶ୍ ।

^{୧୭} କ୍ରିଷ୍ଣୟ ପବିତ୍ର ପ୍ରେମତଡ଼୍ ନିଜେ ନିଜେତିଙ୍କ ନମସ୍କାର ମାଡ଼ାର୍
। ଇଶ୍ବରତେ ନାରୁଡ଼୍ ମିକିଂଙ୍କ ନମସ୍କାର ମାଡ଼ତୁଡ଼୍ ।

^{୧୩} ପ୍ରବୁ ଜିସୁ କ୍ରିଷ୍ଟନ୍ ଅନୁଗ୍ରହ, ଇଶ୍ବରତେ ପ୍ରେମ ନୁ ପବିତ୍ରଆତ୍ମାତେ
ସାହାଯ୍ୟ ମିଇ ସାରେତଡ଼୍ ତ ମାନି ।

^{୧୪} ପ୍ରବୁ ଜିସୁକ୍ରିଷ୍ଟନ୍ ଅନୁଗ୍ରହ, ଇଶ୍ବରତେ ପ୍ରେମ ନୁ ପବିତ୍ର ଆତ୍ମାନ୍
ସହଯୋଗ୍ ମି ସାରେ ନାରୁଡ଼୍ ତଡ଼୍ ମାନି ।

ପୁନାବ୍ ଆର୍
The New Testament in the Koya language of India:
ପୁନାବ୍ ଆର୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍
ପୁନାବ୍ ନିୟମ , 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae